

五代史記注

五代史記卷第七十二

廬陵歐陽脩撰

徐無黨原注

南昌彭元瑞注

劉鳳誥排次

四夷附錄第一

嗚呼夷狄居處飲食隨水草寒暑徙遷有君長部號而無世族文字記別至于弦弓毒矢疆弱相并國地大小興滅不常是皆烏足以考述哉惟其服叛去來能爲中國利害者此不可以不知也自古夷狄之于中國有道未必服無道未必不來蓋自因其盛衰雖常置之治外而羈縻制馭恩威之際不可失也

五代會要後唐天成元年六月十日御史

臺奏伏覲今月三日入闕班退後方引對朝貢番使竊觀近制頗失常儀且月華門是宰相兩省近侍官常朝來往之所外國番國朝見不合出此門而又殿廷班序先後退北者列其百辟示彼四夷俾觀多士之羽儀以顯九重之嚴重豈可衆官退後番客方來合自正門直趨丹陛此是向來事例今辰忽有更張竊以方屬中興宜循舊典伏乞宣付中書門下重令參詳永爲定制奉勅宜令太常禮院檢舊例申奏者右太常禮院奏臣謹按開元禮以賓禮待番客有六一番國王來朝二戒番王見日三番王奉見四受番使表及幣五宴番國王六燕國使從開元定禮之後本朝故事對諸番客又並於內殿引對其殿名曰參殿事在禮賓使客省使不下外諸司見今施行不一今例惟迴鶻番事則正殿引對况迴鶻見居甘州其地猶屬河西道涼州所管每遣使進表幣待以賓禮皇帝御正殿列百官府陳盛儀酌禮沿情事恐太重伏請今後准諸番客例祇於內殿引對不臨正朝兼免乖越又符故事謹具詳酌如前奉勅四夷來王歷代故事前後各因强弱撫制互有典儀大番頒示於威容則於正衙引對小番但推其恩信乃於內殿撫懷憲府奏論禮院詳酌皆徵故事咸有明文正衙威

容未可全廢內殿恩澤且宜常行若遇大番入朝卽准舊儀於正殿鋪陳立仗百官排班於正門引入對見四年二月勅沿邊置場買馬不許番部至闕下周廣順三年三月詔禁沿邊州城市兵仗於諸番部其得之未必爲利失之有足爲患可不慎哉作四夷附錄

夷狄種號多矣其大者自以名通中國其次小遠者附見又其次微不足錄者不可勝數其地環列九州之外而西北常彊爲中國患三代獫狁見于詩書秦漢以來匈奴著矣隋唐之間突厥爲大其後有吐蕃回鶻之彊五代之際以名見中國者十七八而契丹最盛契丹自後魏以來名見中國或曰與庫莫奚同類而異種其居曰裊羅箇沒里沒里者河也是謂黃水之南黃龍之北

得鮮卑之故地故又以爲鮮卑之遺種當唐之世其地
北接室韋東隣高麗西界奚國而南至營州其部族之
大者曰大賀氏後分爲八部其一曰但利皆部二曰乙
室活部三曰實活部四曰納尾部五曰頻没部六曰內
會雞部七曰集解部八曰奚嗛部部之長號大人而常
推一大人建旗鼓以統八部至其歲久或其國有災疾
而畜牧衰則八部聚議以旗鼓立其次而代之被代者
以爲約本如此不敢爭某部大人遙輦次立時劉仁恭
據有幽州數出兵摘星嶺攻之每歲秋霜落則燒其野
草斡丹馬多飢死卽以良馬賂仁恭求市牧地請聽盟

約甚謹八部之人以爲遙輦不任事選于其衆以阿保

機代之

五代史契丹者古匈奴之種也代居遼澤之中潢水南岸南距榆關一千一百里榆關南距幽

州七百里本鮮卑之舊地也其風土人物世代君長前史載之詳矣唐咸通末其王曰錫里濟疆土稍大累來朝貢光啟中其王沁丹者乘中原多故北邊無備遂蠶食諸部達靺奚室韋之屬咸被驅役族帳寢盛有時入寇劉仁恭鎮幽州素知契丹軍情僞選將練兵乘秋深入踰摘星嶺討之霜降秋暮卽燔塞下野草以困之馬多飢死卽以良馬賂仁恭以市牧地仁恭季年荒恣出居大安山契丹背盟數來寇鈔時劉守光戍平州契丹實里王子率萬騎攻之守光僞與之和張幄幕于城外以享之部族就席伏甲起擒實里王子入城部族聚哭請納馬五千以贖之不許沁丹乞盟納賂以求之自是十餘年不能犯塞及沁丹政衰有別部長耶律安巴堅最推雄勁族帳漸盛遂代沁丹爲主先是契丹之先大賀氏有勝兵四萬分爲八部每部皆號大人內推一人爲主建旗鼓以尊之每三年第其名以代之及安巴堅爲主乃怙強恃勇不受諸族之代遂自稱國主

五代

會要契丹本鮮卑之種也居遼澤之中潢水之南遼澤
去榆關一千一百二十里榆關去幽州七百一十四里
其地東南接海東際遼河西北包冷陁北界松陁山川
東西三千里地多松柳澤饒蒲葦其族木姓大賀氏後
分爲八部一曰旦利皆部二曰乙室活部三曰實活部
四曰納尾部五曰頻沒部六曰內會雞部七曰集解部
八曰奚盟部管縣四十一每部有刺史每縣有令酋長
號契丹王唐制兼松漠府都督幽州置松漠府長史一
人監之其後諸姓不常唐會昌中幽州節度使張仲武
表其王屈戌請賜印篆爲奉國契丹之印其入族長皆
號曰大人稱刺史內推一人爲王建旗鼓以尊之每三
年第其名以代之唐末有耶律安巴堅者恃強好勇不
受諸族之代吞侵隣部兵力漸盛嘗與後唐太祖會盟
於雲中結爲兄弟其後僭稱帝號以妻舒魯氏爲皇后
燕人韓延徽爲宰相法令嚴明諸部皆畏伏之遼東
志畧東湖種居西樓在潢水南黃龍北得鮮卑故地或
以爲鮮卑遺種元魏時自號契丹五代末稱太陽契丹
其地有二水一曰北也箇沒里華言玉河源出中京西
南孟山東北流一曰烏羅箇沒里華言潢河源出饒州
西南平地松林直東流至木葉山與玉河合流爲一相

傳初有男子乘白馬浮玉河下一婦人乘小車子浮潢河而下過木葉山顧合流之水遂爲夫婦此其始祖通鑑考異蘇逢吉漢高祖實錄曰契丹本姓大賀氏後分入族一曰利皆郎二曰乙失活郎三曰實活郎四曰納尾郎五曰頻沒郎六曰內會雞郎七曰集解郎八曰奚盟郎管縣四十一縣有令八族之長皆號大人稱刺史常推一人爲王建旗鼓以尊之每三年第其名以相代莊宗列傳咸通末其王曰習爾疆土稍大累來朝貢光啟中其王曰欽德乘中原多故北邊無備遂蠶食諸部達靺奚室韋之屬咸被驅役及欽德政衰阿保機族盛自稱國王天祐二年大寇我雲中太祖遣使連和因與之面會於雲州東城延入帳中約爲兄弟謂曰唐室爲賊臣所篡吾以今冬大舉弟助我精騎二萬同收汴洛保機許諾保機旣還欽德以國事傳之歸田錄契丹阿保機當唐末五代時最盛開平中累遣使聘梁梁亦遣人報聘今世傳李琪金門集有賜契丹詔乃爲阿布機當時書詔不應有誤而自五代以來見於他書者皆爲阿保機雖今契丹之人自謂之阿保機亦不應有失又有趙志忠者本華人也自幼陷虜爲人明敏在虜中舉進士至顯官旣而脫身歸國能述虜中君臣世次

山川風物甚詳又云阿保機虜人實謂之阿阿保機亦保謹未知孰是此聖人所以慎於傳疑也

不知何部人也爲人多智勇略而善騎射是時劉守光暴虐幽涿之人多亡入契丹阿保機乘間入塞攻陷城邑俘其人民依唐州縣置城以居之漢人教阿保機曰中國之王無代立者由是阿保機益以威制諸部而不肯代其立九年諸部以其久不代共責誚之阿保機不得已傳其旗鼓而謂諸部曰吾立九年所得漢人多矣吾欲自爲一部以治漢城可乎諸部許之漢城在炭山東南灤河上有鹽鐵之利乃後魏滑鹽縣也通鑑注宋白曰阿保機居漢城在檀州西北五百五十里城北有龍門山山北有炭山炭山西是契丹室韋二界相連地其地灤河

上源西有鹽泊之利其地可植五穀阿保機率漢人耕
則後魏滑鹽縣也

種爲治城郭邑屋廛市如幽州制度漢人安之不復思
歸阿保機知衆可用用其妻述律策使人告諸部大人
曰我有鹽池諸部所食然諸部知食鹽之利而不知鹽
有主人可乎當來犒我諸部以爲然共以牛酒會鹽池
阿保機伏兵其旁酒酣伏發盡殺諸部大人遂立不復
代通鑑考異賈緯備史武皇會保機故雲州城結以兄
弟之好時列兵相去五里使人馬上持杯往來以展
酬酢之禮保機喜謂武皇曰我蕃中酋長舊法三年則
罷若它日見公復相禮否武皇曰我受朝命鎮太原亦
有遷移之制但不受代則可何憂罷乎保機由此用其
教不受諸族之代趙志忠虜庭雜記云太祖諱億番名
阿保謹父諱軒里太祖生而智入部落主愛其雄勇遂
退其主阿輦氏歸本部立太祖爲王又云凡立王則衆

部酋長皆集會議其有德行功業者立之或災害不生
羣牧孽盛人民安堵則王更不替代苟不然其諸酋會
衆部別選一名爲王故王以番法亦甘心退焉不爲衆
所害又曰有韓知古韓頴康枚王奏事王郁皆中國人
共勸太祖梁將篡唐晉王李克用使人聘于契丹阿保
不受代

機以兵三十萬會克用于雲州東城置酒酒酣握手約

爲兄弟克用贈以金帛甚厚期共舉兵擊梁阿保機遺

晉馬千匹

通鑑考異紀年錄太祖以阿保機族黨稍盛
召之天祐二年五月阿保機領其部族三十

萬至雲州東城帳中言事握手甚歡約爲兄弟旬日而
去留男骨都舍利首領沮橐梅爲質約冬初大舉渡河
反正會昭宗既歸而背約遣使者袍笏梅老聘梁梁遣
遇盜而止

太府卿高頃軍將郎公遠等報聘逾年頃還阿保機遣
使者解里隨頃以良馬貂裘朝霞錦聘梁奉表稱臣以

求封冊梁復遣公遠及司農卿渾特以詔書報勞別以
記事賜之約共舉兵滅晉然後封冊爲甥舅之國又使
以子弟三百騎入衛京師克用聞之大恨是歲克用病
臨卒以一箭屬莊宗期必滅契丹渾特等至契丹阿保
機不能如約梁亦未嘗封冊而終梁之世契丹使者四
至五代史天祐四年大寇雲中後唐武皇遣使連和因
與之面會于雲中東城大具享禮延入帳中約爲兄
弟謂之曰唐室爲賊所篡吾欲今冬大舉弟可以精騎
二萬同收汴洛安巴堅許之賜與甚厚留馬三千匹以
答賜左右咸勸武皇可乘間擴之武皇曰逆賊未殄不
可失信于部落自亡之道也乃盡禮遣之及梁祖建號
安巴堅亦遣使送名馬女樂貂皮等求封冊梁祖與之
書曰朕今天下皆平惟有太原未服卿能長驅精甲徑
至新莊爲我翦彼仇讐與爾便行封冊莊宗初嗣世亦
遣使告哀賂以金繒求騎軍以救潞州答其使曰我與

先王爲兄弟兒郎吾兒也寧有父不助子耶許出師會潞平而止劉守光末年苛慘軍士亡叛皆入契丹洎周德威攻圍幽州燕之軍民多爲所寇掠既盡得燕中人士敎之文法由是漸盛五代會要梁開平元年四月遣其首領博果勒美楞等來貢方物至二年二月其主安巴堅又遣使濟勒貢細馬十匹金花鞍轡貂鼠皮裘并冠男口一年十歲名曰蘇女口一年十一歲名曰璧其妻紆嚕氏貢朝霞錦前國王欽德并其大臣皆有貢獻太祖命司農卿渾特右千牛衛將軍郎公遠充使就本國宣諭三年閏八月又遣首領葛祿來貢方物太祖御文明殿召嚕嚕等五十人張譙賜金帛有差至五年四月又遣使什哩美楞來朝貢

莊宗天祐十三年阿保機攻晉蔚州執其振武節度使李嗣本是時莊宗已得魏博方南向與梁爭天下遣李存矩發山北兵存矩至祁溝關兵叛擁偏將盧文進擊殺存矩亡入契丹契丹攻破新州以文進部將劉殷守之莊宗遣

周德威擊殷而文進引契丹數十萬大至德威懼引軍去爲契丹追及大敗之德威走幽州契丹圍之幽薊之間虜騎遍滿山谷所得漢人以長繩連頭繫之于木漢人夜多自解逃去文進又敎契丹爲火車地道起土山以攻城城中鎔銅鐵汁揮之中者輒爛墮德威拒守百餘日莊宗遣李嗣源閻寶李存審等救之契丹數爲李嗣源所敗乃解去

五代史十三年八月安巴堅率諸部號稱百萬自麟勝陷振武長驅雲朔

北邊大擾莊宗赴援于代敵衆方退十四年新州大將盧文進爲衆所迫殺新州團練使李存矩于祁溝關返攻新武周德威以衆擊之文進不利乃奔于契丹引其衆陷新州周德威率兵三萬以討之敵騎援新州德威爲敵所敗殺傷殆盡契丹乘勝攻幽州是時或言契丹三十萬或言五十萬幽薊之北所在敵騎皆滿莊宗遣

明宗與李存審閭實將兵救幽州遂解其圍語在莊宗
紀中冊府元龜後唐莊宗初爲晉王天祐十四年二
月新州偏將盧文進殺其帥李存矩叛投契丹寇我新
州先是契丹阿保機當武皇時屢盟於雲中面相約束
款塞交歡義爲弟兄急難相救彼無侵苦至是容納叛
臣渝盟犯塞使讓之曰畫野離疆雖有華戎之別惟忠
與信不違蠻貊之邦契丹王氣稟貞剛心懷仁義爲天
山之貴族處玉塞之雄藩恩加辨髮之鄉威讐控弦之
俗往者降情修好款曲通盟各守封疆交陳贊幣錦車
使者常馳問遺之書牙帳賢王頗識會同之禮關山無
事風馬有歸青塚路邊罕有射鵰之騎受降城北更無
遺鏃之憂永保初終不渝信誓近者盧文進潛圖克逆
苟避誅夷包姦蘊惡之情何方可保有父有君之國皆
所不容契丹王未始包藏專聽誑惑黨一夫之罪惡絕
輒將左社之徒幸我中原之利見蒐兵甲決戰西樓暫
勞車騎之師佇見藁街之首王壺清話盧文進范陽
人少從軍身長八尺姿貌偉異名振燕薊莊宗連兵於
河屢戰獲勝一夕忽敗夜走馬墜澗中纔及水一躍
而出明日視之乃郡之黑龍潭絕岸高險深不可測文

進知有神助已氣因復振收餘眾會食於野一巨蛇長
十餘丈徑至坐所眾皆奔避獨文進不動蛇引首及膝
文進以匕筋取食飼之訖蛇蜿蜒方去奔敗之餘物積
疑阻舉眾入契丹虜主厚遇使率兵救鎮冀父與莊宗
連戰明宗卽位老思南土部曲皆華人復還中國明宗
親加宴勞因詔得封大將軍八十二無病卒卒之日星
殞于寢大如孟文進噓
赤光丈餘與星相接

契丹比他夷狄尤頑傲父母死
以不哭爲勇載其尸深山置大木上後三歲往取其骨
焚之酹而呪曰夏時向陽食冬時向陰食使我射獵猪
鹿多得其風俗與奚靺鞨頗同至阿保機稍并服旁諸
小國而多用漢人漢人教之以隸書之半增損之作文
字數千以代刻木之約又制婚嫁置官號乃僭稱皇帝
自號天皇王以其所居橫帳地名爲姓曰世里世里譯

者謂之耶律

文昌雜錄余嘗見樞密都承旨張誠一說昔年使北虜因問耶律蕭姓所起彼人云

天皇王問大臣云自古帝王英武為誰耶其大臣對曰

莫如漢高祖又問將相勲德孰為優對以蕭何天皇王

遂姓律耶氏譯云劉也其後亦錫姓蕭氏歐陽少師作

五代史乃曰天皇王阿保機以其所居橫帳地名為姓

世里世里譯者謂耶律昔蕭翰為契丹大族其號阿鉢

本無姓氏李松為製姓名曰蕭翰於是姓蕭二者不知

孰是也名年曰天贊以其所居為上京起樓其間號西樓

又于其東千里起東樓北三百里起北樓南木葉山起

南樓往來射獵四樓之間

通鑑考異虜庭雜記太祖一舉并吞奚國仍立奚人依舊

為奚王命契丹監督兵甲又滅渤海虜其王大誣譔立

長子為渤海東丹王號人皇王自號天皇王始立年號

曰天贊國稱大遼於所居大部落置樓謂之西樓今謂

之上京又於其南木葉山置樓謂之南樓又於其東千

里置樓謂之東樓又於其北三百里置樓謂之北樓太

祖四季常遊獵于四樓之間又曰阿保基變家為國之

後始以王族號爲橫帳姓世里沒里以漢語譯之謂之耶律氏賜后族姓曰蕭氏王族惟與后族同昏其諸部若不奉北主之命不得與二部落通昏

契丹好鬼而貴日每月朔旦東向而拜日其大會聚視國事皆以東向爲尊四樓門屋皆東向莊宗討張文禮圍鎮州定州王處直懼鎮且亡晉兵必并擊已遣其子郁說契丹使入塞以牽晉兵郁謂阿保機曰臣父處直使布思欵曰故趙王王鎔王趙六世鎮州金城湯池金帛山積燕姬趙女羅綺盈庭張文禮得之而爲晉所攻懼死不暇故皆留以待皇帝阿保機大喜其妻述律不肯曰我有羊馬之富西樓足以娛樂今捨此而遠赴人之急我聞晉兵彊天下且戰有勝

敗後悔何追阿保機躍然曰張文禮有金玉百萬留待
皇后可共取之于是空國入寇郁之召契丹也定人皆
以爲契丹必爲患不可召而處直不聽郁已去處直爲
其子都所廢阿保機攻幽州不克又攻涿州陷之聞處
直廢而都立遂攻中山渡沙河都告急于莊宗莊宗自
將鐵騎五千遇契丹前鋒于新城晉兵自桑林馳出人
馬精甲光明燭日虜騎愕然稍却晉軍乘之虜遂散走
而沙河水薄虜皆陷沒阿保機退保望都會天大雪契
丹人馬飢寒多死阿保機顧盧文進以手指天曰天未
使我至此乃引兵去莊宗躡其後見其宿處環積在地

方隅整然雖去而不亂歎曰虜法令嚴蓋如此也五代史

八年十月鎮州大將張文禮弑其帥王鎔莊宗討之時
定州王處直與文禮合謀遣威塞軍使王郁復引契丹
爲援十二月安巴堅傾塞入寇攻圍幽州李紹宏以兵
城守契丹長驅陷涿郡執刺史李嗣弼進攻易定至新
樂渡沙河王郁遣使告急時莊宗在鎮州行營聞前鋒
報曰契丹渡沙河軍中咸恐議者請權釋鎮州之圍以
避之莊宗曰霸王舉事自有天道契丹其如我何國初
突厥入寇至于渭北高祖欲棄長安遷都樊鄧太宗曰
獫狁孔熾自古有之未聞遷移都邑霍去病漢廷將帥
猶且志滅匈奴況帝王應運而欲移都避寇哉文皇雄
武不數年俘二突厥爲衛士今吾以數萬之衆安集山
東王德明廝養小安巴堅生長邊地豈有退避之理
吾何面視蒼生哉爾曹但駕馬同行看吾破敵莊宗親
御鐵騎五千至新城北遇契丹前鋒萬騎莊宗精甲自
桑林突出光明照日諸部愕然緩退莊宗分二廣以乘
之敵騎散退時沙河微冰其馬多陷安巴堅退保望都
是夜莊宗次定州翼日出戰遇奚長托諾五千騎莊宗
親軍千騎與之鬪爲敵所圍外救不及莊宗挺馬奮躍

出入數四酣戰不解李嗣昭聞其急也灑泣而往攻破敵陣掖莊宗而歸時契丹值大雪野無所掠馬無芻草凍死者相望于路安巴堅召盧文進以手指天謂之曰天未令我到此乃引衆北去莊宗率精兵騎蹙其後每經安巴堅野宿之所布秸在地方而環之雖去無一莖亂者莊宗謂左右曰蕃人法令如是豈中國所及莊宗至幽州發二百騎偵之皆契丹雖無所得而歸然自此爲契丹所獲莊宗乃還

頗有窺中國之志患女真渤海等在其後欲擊渤海懼中國乘其虛乃遣使聘唐以通好同光之間使者再至莊宗崩明宗遣供奉官姚坤告哀于契丹坤至西樓而阿保機方東攻渤海坤追至慎州見之阿保機錦袍大帶垂後與其妻對坐穹廬中延坤入謁阿保機問曰聞爾河南北有兩天子信乎坤曰天子以魏州軍亂命總

管令公將兵討之而變起洛陽凶問今至矣總管返兵河北赴難京師爲衆所推已副人望阿保機仰天大哭曰晉王與我約爲兄弟河南天子卽吾兒也昨聞中國禍亂欲以甲馬五萬往助我兒而渤海未除志願不遂又曰我兒旣沒理當取我商量新天子安得自立坤曰新天子將兵二十年位至大總管所領精兵三十萬天時人事其可得違其子突欲在側曰使者無多言蹊田奪牛豈不爲過坤曰應天順人豈比匹夫之事至如天皇王得國而不代豈彊取之耶阿保機卽慰勞坤曰理正當如是爾又曰吾聞此兒有宮婢二千人樂官千人

放鷹走狗嗜酒好色任用不肖不惜人民此其所以敗也我自聞其禍卽舉家斷酒解放鷹犬罷散樂官我亦有諸部樂官千人非公宴不用我若所爲類吾兒則亦安能長久又謂坤曰吾能漢語然絕口不道于部人懼其効漢而怯弱也因戒坤曰汝當先歸吾以甲馬三萬會新天子幽鎮之間共爲盟誓與我幽州則不復侵爾矣阿保機攻渤海取其扶餘一城以爲東丹國以其長子人皇王突欲爲東丹王已而阿保機病死述律護其喪歸西樓立其次子元帥太子耀屈之坤從至西樓而還

五代史天祐末安巴堅乃自稱皇帝署中國官號其俗舊隨畜牧素無邑屋得燕人所教乃爲城郭宮室

之制于漠北距幽州三千里名其邑曰西樓邑屋門皆
東向如車帳之法城南別作一城以實漢人名曰漢城
城中有佛寺三僧尼千人其國人號安巴堅爲天皇王
同光中安巴堅深著闡地之志欲收兵大舉慮渤海踵
其後三年舉其衆討渤海之遼東令托諾盧文進據營
平等州擾我燕薊明宗初纂嗣遣供奉官姚坤奉書告
哀至西樓邑屬安巴堅在渤海又徑至慎州崎嶇萬里
旣至謁見安巴堅延入穹廬安巴堅身長九尺被錦袍
大帶垂後與妻對榻引見坤安巴堅致命安巴堅先問曰
聞爾漢土河南河北各有一天子信乎坤曰河南天子
今年四月一日洛陽軍變今凶問至矣河北總管令公
比爲魏王軍亂先帝詔令除討旣聞內難軍衆離心及
京城無主上下堅冊令公請主社稷今已順人望登帝
位矣安巴堅號咷聲淚俱發曰我與河東先世約爲兄
弟河南天子吾兒也近聞漢地兵亂點得甲馬五萬騎
比欲自往洛陽救助我兒又緣渤海未下我兒果致如
此冤哉泣下不能已又謂坤曰今漢土天子初開洛陽
有難不急救致令及此坤曰非不急切地遠阻隔不及
也又曰我兒旣殂當合取我商量安得自便坤曰吾皇
將兵二十年位至大總管所部精兵三十萬衆口一心

堅相推戴達之則立見禍生非不知稟天皇王意旨無
奈人心何其子托雲在側謂坤曰漢使勿多談因引左
氏牽牛蹊田之說以折坤曰應天順人不同匹夫之
義祇如天皇王初領國事豈是強取之耶安巴堅因曰
理當如此我漢國兒子致有此難我知之矣聞此兒有
宮婢二千樂官千人終日放鷹走狗耽酒嗜色不惜人
民任使不肖致使天下皆怒我自聞如斯常憂傾覆一
月前已有人來報知我兒有事我便舉家斷酒解放鷹
犬休罷樂官我亦有諸部家樂千人非公宴未嘗妄舉
我若所爲似我兒亦應不能持久矣從此願以爲戒又
曰漢國兒與我雖父子亦會彼此讎敵俱有惡心與爾
今天子無惡足得歡好爾先復命我續將馬萬騎至幽
鎮以南與爾家天子面爲盟約我要幽州令漢兒把捉
更不復侵入漢界又問漢收得西川信不坤曰去年九
月出兵十一月十六日收下東西川得兵馬二十萬金
帛無算皇帝初卽位未辨送來續當遣使至矣安巴堅
忻然曰聞西有劍閣兵馬從何過得坤曰川路雖險然
先朝收復河南有精兵四十萬良馬十萬騎但通人行
處便能去得視劍閣如平地耳安巴堅善漢語謂坤曰
吾解漢語歷口不敢言懼部人效我令兵士怯弱故也

坤至止三日安巴堅病傷寒一夕大星殞于其帳前俄而卒于扶餘城時天成元年七月二十七日也其妻舒魯氏自率衆護其喪歸西樓坤亦從行得報而還旣而舒魯氏立其次子德光爲渠帥以總國事等遣使告哀明宗爲之報朝當阿保機時有韓延徽者幽州人也爲劉守光

參軍守光遣延徽聘于契丹延徽見阿保機不拜阿保機怒留之不遣使牧羊馬久之知其材召與語奇之遂用以爲謀主阿保機攻党項室韋服諸小國皆延徽謀也延徽後逃歸事莊宗莊宗客將王緘譖之延徽懼求歸幽州省其母行過常山匿王德明家居數月德明問其所向延徽曰吾欲復走契丹德明以爲不可延徽曰阿保機失我如傷兩目而折手足今復得我必喜乃復

走契丹阿保機見之果大喜以謂自天而下阿保機僭號以延徽爲相號政事令契丹謂之崇文令公後卒于虜

契丹國志韓延徽幽州人也仕劉守光爲幕府參軍守光與六鎮構怨自稱燕帝延徽諫之不從守光置斧質于庭曰敢諫者斬孫鶴力諫守光殺之延徽以幕府之舊且素重之得全守光末年衰困盧龍巡屬皆入于晉遣延徽求援于契丹太祖怒其不拜留之使牧馬于野延徽有智畧頗知屬文述律太后言于太祖曰延徽能守節不屈此今之賢者奈何辱以牧圉宜禮用之太祖召延徽語悅之遂以爲謀主舉動訪焉延徽始教太祖建牙開府築城郭立市里以處漢人使各有配偶墾藝荒田由是漢人各安生業逃亡者益少契丹威服諸國延徽有助焉頃之延徽述奔晉王晉王欲置之幕府掌書記王緘疾之延徽不自安求東歸省母過真定止于鄉人王德明家德明問所之延徽曰今河北皆爲晉有當復詣契丹耳德明曰叛而復往得無取死乎延徽曰彼自吾歸如喪手目今往詣之彼手目復完安肯害我旣省母遂復入契丹太祖聞其至大喜如自天而

下拊其背曰向者何往延徽曰思母欲告歸恐不聽故私歸耳太祖待之甚厚及稱帝以延徽爲相累遷至中書令晉王遣使至契丹延徽寓書于晉王叙所以北去之意且曰非不戀英主非不思故鄉所以不留正懼王緘之讒耳固以老母爲託且曰延徽在此契丹必不南牧故終同光之世契丹不深入南牧延徽之力也後太宗援石晉得幽燕會同稱制以延徽兼樞密使同平章事後數年延徽卒于契丹

耀屈之後更

名德光葬阿保機木葉山諡曰大聖皇帝

五代史明年正月葬安巴

堅于木葉山僞諡曰大聖皇帝

後更其名曰億德光立三年改元曰天

顯遣使者以名馬聘唐并求碑石爲阿保機刻銘明宗厚禮之遣飛勝指揮使安念德報聘定州王都反唐遣王晏球討之都以蠟丸書走契丹求援德光遣禿餒煎刺等以騎五千救都都及禿餒擊晏球于曲陽爲晏球

所敗德光又遣惕隱赫邈益禿餒以騎七千晏球又敗之于唐河赫邈與數騎返走至幽州爲趙德鈞所執而晏球攻破定州擒禿餒剌皆送京師明宗斬禿餒等六百餘人而赦赫邈選其壯健者五十餘人爲契丹直初阿保機死長子東丹王突欲當立其母述律遣其幼子安端少君之扶餘代之將立以爲嗣然述律尤愛德光德光有智勇素已服其諸部安端已去而諸部希述律意共立德光突欲不得立長興元年自扶餘泛海奔于唐明宗因賜其姓爲東丹而更其名曰慕華以其來自遼東乃以瑞州爲懷化軍拜慕華懷化軍節度瑞慎

等州觀察處置等使其部曲五人皆賜姓名罕只曰罕友通穆葛曰穆順義撒羅曰羅賓德易密曰易師仁蓋禮曰蓋來賓以爲歸化歸德將軍郎將又賜前所獲赫邈姓名曰狄懷惠捏列曰列知恩煎刺曰原知感福郎曰服懷造竭失訖曰乙懷宥其餘爲契丹直者皆賜姓名二年更賜突欲姓李更其名曰贊華三年以贊華爲義成軍節度使契丹自阿保機時侵滅諸國稱雄北方及救王都爲王晏球所敗喪其萬騎又失赫邈等皆名將而述律尤思念突欲由是卑辭厚幣數遣使聘中國因求歸赫邈煎刺等唐輒斬其使而不報當此之時中

國之威幾振距幽州北七百里有渝關關東臨海北有
兔耳覆舟山山皆斗絕並海東北有路狹僅通車其旁
地可耕種唐時置東西狹石淶疇米磚長楊黃花紫蒙
白狼等戍以扼契丹于此戍兵常自耕食惟衣絮歲給
幽州久之皆有田宅養子孫以堅守爲己利自唐末幽
薊割據戍兵廢散契丹因得出陷平營而幽薊之人歲
苦寇鈔自涿州至幽州百里人迹斷絕轉餉常以兵護
送契丹多伏兵于鹽溝以擊奪之莊宗之末趙德鈞鎮
幽州于鹽溝置良鄉縣又于幽州東五十里築城皆戍
以兵及破赫邈等又于其東置三河縣由是幽薊之人

始得耕牧而輸餉可通德光乃西徙橫帳居捺剌泊出
寇雲朔之間明宗患之以石敬瑭鎮河東總大同彰國
振武威塞等軍禦之應順清泰之間調發饋餉遠近勞
敝德光事其母甚謹常侍立其側國事必告而後行石
敬瑭反唐遣張敬達等討之敬瑭遣使求救于德光德
光白其母曰吾嘗夢石郎召我而使者果至豈非天邪
母召胡巫問吉凶巫言吉乃許是歲九月契丹出鴈門
車騎連亘數十里將至太原遣人謂敬瑭曰吾爲爾今
日破敵可乎敬瑭報曰皇帝赴難要在成功不在速大
軍遠來而唐軍甚盛願少待之使者未至而兵已交敬

達大敗敬瑭夜出北門見德光約爲父子問曰大兵遠來戰速而勝者何也德光曰吾謂唐兵能守鴈門而扼諸險要則事未可知今兵長驅深入而無阻吾知大事必濟且吾兵多難久宜以神速破之此其所以勝也

丹

國志敬瑭見契丹帝問曰皇帝遠來士馬疲倦遽與唐大戰而勝何也帝曰始我謂唐必斷鴈門諸路伏兵險要不可得進使人偵視皆無之是以長驅而深

敬達敗

入我氣方銳乘此擊之是以勝之敬瑭歎服退保晉安寨德光圍之唐遣趙德鈞延壽救敬達而德鈞父子按兵團柏谷不救德光謂敬瑭曰吾三千里赴義義當徹頭乃築壇晉城南立敬瑭爲皇帝自解衣冠被之冊曰咨爾子晉王子視爾猶子爾視予猶父已而

楊光遠殺敬瑭降晉晉高祖自太原入洛陽德光送至
潞州趙德鈞延壽出降德光謂晉高祖曰大事已成吾
命大相溫從爾渡河吾亦留此俟爾入洛而後北臨訣
執手噓歔脫白貂裘以衣高祖遺以良馬二十匹戰馬
千二百匹戒曰子子孫孫無相忘時天顯九年也五代會要
後唐同光二年三月安巴堅率所部入寇新城其年七
月又率兵東攻渤海國至九月爲都部室韋女真迴鶻
所侵十二月又入寇嵐州三年二月復入寇幽州爲王
師所敗俘其首領過達木等其年五月又遣使伊壘等
來貢方物四年正月安巴堅復寇渤海國又遣美楞錫
哩已下三十七人貢馬三十匹詐脩和好天成元年九
月攻渤海國扶餘城下之命其長子托雲爲國主號東
丹王其月二十七日安巴堅得疾而殂第二子元帥太
子德光嗣立德光本名曠屈之慕中國之名故改爲德
光初安巴堅有三子長號人皇王次號元帥太子次曰

安端少君及安巴堅死其妻舒嚕氏令第二子元帥太子德光勾當兵馬令少子安端少君往渤海國代托雲將立爲嗣而元帥太子素爲部族所敬又其母舒嚕氏亦常鍾愛故因而立之紀年天顯元年葬安巴堅于西樓番中地名上謚大聖皇帝其年十月遣使沙古奈來告哀明宗輟其月十九日朝參以禮之其月其平州守將領幽州節度使盧文進率戶口兵馬車帳來降至二年十一月又遣使美梅等二十餘人朝貢兼申和好之意明宗命飛勝指揮使安念德齋錦綺綾羅及金花銀器寶裝酒器等遺之又遺其母舒嚕氏繡被一張并寶裝瓔珞至三年正月復入寇陷平州而去至其年五月定州節度使王都叛命潛相連構其主德光遣守領圖奈率襍虜數千騎入定州七月又遣首領特哩袞等率七千餘騎來援尋爲行營招討使王晏球等逆戰破之勦戮甚衆餘黨復爲幽州節度使趙德鈞所襲殺獲殆盡擒其首領特哩袞等其月王晏球等又獲契丹絹書二封來進明宗命宣示羣臣莫有識其文字者契丹本無文記唯刻木爲信漢人陷番者以隸書之半就加增減撰爲番書同光之後稍稍有之其年八月幽州部送所獲番將特哩袞已下六百餘人至京師明宗皆赦

之選其尤壯健者立爲契丹直其首領皆賜姓名時言
事者以爲契丹悻戾不可置于君側俄而有首領吉趙
賓自京遁歸奪船過河至深州捕獲斬之至其年閏八
月其平州刺史張希崇來降四年三月定州行營招討
使王晏球擒圖奈等二十餘人獻於闕下悉命戮之長
興元年十一月契丹渤海東丹王托雲率番官四十餘
人馬百匹自登州泛海內附明宗御文明殿召對及其
部曲慰勞久之賜以衣冠金玉帶鞍馬錦綵器物等托
雲進本國印三面宣示宰臣其年十二月中書門下奏
契丹國東丹王托雲遠泛滄溟來歸王化請賜姓名仍
准番官入朝例安排謹按四夷入朝番官有懷德懷化
歸德歸化等將軍中郎將名號又本朝賜新羅渤海兩
番國王官初自檢校司空至太保今托雲是安巴堅之
子請比新羅渤海王例施行勅渤海國王人皇王托雲
契丹先收渤海國改爲東丹其托雲宜賜姓東丹名慕
華授光祿大夫檢校太保安東都護兼御史大夫上柱
國渤海郡開國公食邑一千五百戶充懷化軍節度瑞
慎等州觀察處置押番落等使二年九月賜姓李名贊
華三年五月授滑州節度使爲廢帝所殺至二年其契
丹王母舒嚕氏以其子托雲歸國遣使朝貢明宗深慰

納之至三年三月禮賓使梁進德自契丹報聘迴稱其王請放咱喇錫哩還本國咱喇亦定州所獲番將也又謂去年十二月十二日其王帳前有大星晝隕聲若雷震其月又遣使特格喇克察進馬三十匹亦以放煎刺歸國故也五月特格喇克察迴明宗欲放咱喇刺等令歸大臣爭之未決會幽州節度使趙德鈞上表論奏及易州刺史楊愐皆言不可遣其事乃止仍遣咱古錫里隨其使歸不欲全阻其請也其年七月又遣使都督舒魯進馬三十匹清泰三年五月晉高祖起義於太原九月官軍集於城下晉乃間道發使召德光爲援是月德光率部落五萬餘騎至太原城下等敗招討使張敬德楊光遠之兵降于晉安大砦高祖已入洛

德光乃北執趙德鈞延壽以歸德鈞幽州人也事劉守光守文爲軍校莊宗伐燕得之賜姓名曰李紹斌其子延壽本姓劉氏常山人也其父祁爲蔚縣令劉守文攻破蔚縣德鈞得延壽并其母种氏而納之因以延壽爲

子延壽爲人姿質妍柔稍涉書史明宗以女妻之號興平公主莊明之世德鈞鎮幽州十餘年以延壽故尤見信任延壽明宗時爲樞密使罷至廢帝立復以爲樞密使晉高祖起太原廢帝遣延壽將兵討之而德鈞亦請以鎮兵討賊廢帝察其有異志使自飛狐出擊其後而德鈞南出吳兒會延壽于西唐延壽因以兵屬之廢帝以德鈞爲諸道行營都統延壽爲太原南面招討使德鈞爲延壽求鎮州節度使廢帝怒曰德鈞父子握彊兵求大鎮苟能敗契丹而破太原雖代子亦可若翫寇要君但恐犬兔俱斃因遣使者趣德鈞等進軍德鈞陰遣

人聘德光求立己爲帝德光指穹廬前巨石謂德鈞使者曰吾已許石郎矣石爛可改也德光至潞州鎖德鈞父子而去德光母述律見之問曰汝父子自求爲天子何邪德鈞慙不能對悉以田宅之籍獻之述律問何在曰在幽州述律曰幽州屬我矣何獻之爲明年德鈞死德光以延壽爲幽州節度使封燕王

五代史趙德鈞本名行實幽州人也

少以騎射事滄州連帥劉守文守文爲弟守光所害遂事守光署爲幽州軍校及唐莊宗伐幽州德鈞知其必敗乃遁歸莊宗莊宗善待之賜姓名曰紹斌累歷郡守從平梁遷滄州節度使同光三年移鎮幽州明宗卽位遂歸本姓始改名德鈞其子延壽尙明宗女興平公主故德鈞尤承倚重天成中定州王都反契丹遣特哩衮領精騎五千來援都至唐河爲招討使王晏球所敗會霖雨相繼所在泥淖敗兵北走人馬飢疲德鈞于要路

邀之盡獲餘衆擒特哩衮已下首領數十人獻于京師
明年王都平加兼侍中頃之加東北面招討使德鈞奏
發河北數鎮丁夫開王馬口至游口以通水運凡二百
里又于閭溝築壘以戍兵守之因名良鄉縣以備鈔寇
又于幽州東築三河城北接薊州頗爲形勝之要部民
由是稍得樵牧德鈞鎮幽州凡十餘年甚有善政累官
至檢校太師兼中書令封北平王清泰三年夏晉高祖
起義于晉陽九月契丹敗張敬達之軍于太原城下唐
末帝詔德鈞以本軍由飛狐路出賊後邀之時德鈞子
延壽爲樞密使唐末帝命帥軍屯上黨德鈞乃以所部
銀鞍契丹直三千騎至鎮州率節度使華溫琪同赴征
行自吳兒峪路趨昭義與延壽會于西唐店十一月以
德鈞爲諸道行營都統以延壽爲太原南面招討使遣
端明殿學士呂琦齎賜官告兼令犒軍琦從容言天子
委任之意德鈞曰旣以兵相委焉敢惜死時范延光領
兵二萬軍于遼州德鈞欲併其軍奏請與延光會合唐
末帝諭延光疑其姦謀不從德鈞延壽自潞州引軍至
團栢谷德鈞累奏乞授延壽鎮州節度末帝不悅謂左
右曰趙德鈞父子堅要鎮州苟能逐退蕃戎要代予位
亦所甘心若旣寇要君但恐犬兔俱斃朝廷繼馳書詔

促令進軍德鈞持疑不果乃遣使于契丹厚齎金幣求
立以爲帝仍許晉祖長鎮太原契丹主不之許及楊光
遠以晉安寨降于契丹德鈞父子自團栢谷南走潞州
一行兵士投戈棄甲自相騰踐死者萬計時德鈞有愛
將時賽率輕騎東還漁陽其部曲尚千餘人與散亡之
卒俱集于潞州是日潞州節度使高行周亦自北還及
至府門見德鈞父子在城闔上行周謂曰某與大王鄉
人宜以忠言相告城中無斗粟可食請大王速迎車駕
自圖安計無取後悔焉德鈞遂與延壽出降契丹高祖
至德鈞父子迎謁于馬前高祖不禮之時契丹主問德
鈞曰汝在幽州日所置銀鞍契丹直何在德鈞指示之
契丹盡殺于潞之西郊遂鑲德鈞父子入蕃及見國母
舒嚕氏盡以一行財寶及幽州田宅籍而獻之國母謂
之曰汝父子自覓天子何耶德鈞俛首不能對又問田
宅何在曰俱在幽州國母曰屬我矣又何獻也天福二
年夏德鈞卒于契丹又延壽本姓劉氏父曰邴常山
人也常任舊令梁開平初滄州節度使劉守文陷其邑
時德鈞爲偏將獲延壽并其母种氏遂養之爲子延壽
姿貌妍柔稍涉書史尤好賓客亦能爲詩及長尙明宗
女興平公主初爲汴州司馬明宗卽位授汝州刺史歷

河陽宋州節度使入爲上將軍充宣徽使遷樞密使兼
鎮徐州及高祖起義于晉陽唐末帝幸懷州委延壽北
伐後高祖至潞州延壽與父德鈞俱陷北庭未幾契丹
主以延壽爲幽州節度使封燕王尋爲樞密使兼政事
令天福末契丹旣與少帝絕好契丹主委延壽以圖南
之事許以中原帝之延壽乃導誘蕃戎蠶食河朔晉軍
旣降于中渡戎王命延壽就寨安撫諸軍仍賜龍鳳赭
袍使衣之而往謂之曰漢兒兵士皆爾有之爾宜親自
慰撫延壽至營杜重威李守貞已下皆迎謁于馬前及
契丹入汴時南北降軍數萬皆野次于陳橋契丹主慮
其有變欲盡殺之延壽聞之遽請見契丹主曰臣伏見
今日已前皇帝百戰千征始收得晉國不知皇帝自要
治之乎爲他人取之乎契丹主變色曰爾何言之過也
朕以晉人負義舉國南征五年相殺方得中原豈不自
要爲主而爲他人耶卿有何說速奏朕來延壽曰皇帝
嘗知吳蜀與晉朝相殺否曰知延壽曰今中原南自安
申西及秦鳳沿邊數千里並是兩界守戍之所將來皇
帝歸國時又漸及炎蒸若吳蜀二寇交侵中國未知如
許大世界教甚兵馬禦捍苟失隄防豈非爲他人取也
契丹主曰我弗知也爲之奈何延壽曰臣知上國之兵

當炎暑之時，汭吳蜀之境，難爲用也。未若以陳橋所聚降軍，圍併別作軍額，以備邊防。契丹主曰：「念在壺關失斷陽城時，亦曾言議未獲區分，致五年相殺。此時入手如何？更不翦除。」延壽曰：「晉軍見在之數，如今還似從前盡在河南，誠爲不可。」臣請遷其軍，并其家口于鎮定雲朔間，以處之。每歲差伊分番于河外沿邊防戍。斯上策也。契丹主忻然曰：「一取大王商量，由是陳橋之衆獲免長平之禍焉。」延壽在汭久之，知契丹主無踐言之意，乃遣李崧達語契丹主，求立爲皇太子。崧不得已，言之。契丹主曰：「我于燕王無所愛惜，但我皮肉堪與燕王使用，亦可割也。何況他事？」我聞皇太子天子之子，合作燕王，豈得爲之也？因命與燕王加恩。時北來翰林學士承旨張礪擬延壽爲中京留守，大丞相錄尚書事都督中外諸軍事樞密使燕王如故。契丹主覽擬狀，索筆塗却錄尚書事都督中外諸軍事之字，乃付翰林院草制焉。又以其子匡贊爲河中節度使，延壽在汭州復娶明宗小女爲繼室。先是，延州節度使周密爲其子廣娶焉，已納財畢，親迎有日矣。至是，延壽奪取之。契丹主自汭迴至邢州，命升延壽坐在契丹左右相之上。契丹主死，延壽下教于諸道，稱權知南朝軍國事。是歲六月一日，爲永

康王烏裕所鎖籍其家財分給諸部等以延壽入國竟卒于契丹匡贊歷漢周兩朝累授節鎮及統軍使仕皇朝歷廬延壽德鈞等四鎮焉太平廣記趙延壽傳僞遼丞相趙延壽德鈞之子也仕唐爲樞密使清泰末自太原陷虜耶律德光用爲僞丞相綜國事晉少主失政延壽導戎王爲亂凡數年之間盜有中夏實延壽贊成之力也延壽將家子幼習武畧卽戎之暇時以篇什爲意亦甚有雅致常在虜庭賦詩曰黃沙風捲空拋雲動陰山雪滿郊探水人迴移帳就射鵬箭落着弓抄烏逢霜果飢還啄馬渡冰河渴跑占得高原肥草地夜深生火折林梢南人聞者往往傳之契丹國志趙延壽相州人也父德鈞唐爲盧龍節度使石敬瑭叛與契丹合擊張敬達潞王令德鈞將幽州兵由飛狐出契丹軍後德鈞密與契丹通許以厚賂云若立己爲帝卽請以見兵南平洛陽與契丹爲兄弟國契丹以晉安未下欲許德鈞之請晉高祖亟使桑維翰入說太宗太宗從之指帳前石謂德鈞使者曰我已許石郎此石爛方可改也會太宗至潞州德鈞父子迎謁于高河太宗問德鈞曰汝在幽州所置銀鞍契丹直何在德鈞指示之太祖命盡數殺之於西郊凡三千人遂鎖德鈞延壽送歸其

國德鈞見述律太后悉以所齎寶貨并籍其田宅獻之
太后問曰汝近者何爲往太原德鈞曰奉唐主之命太
后指天曰汝從我兒求爲天子何妄語耶又自指其心
曰此不可欺也又曰吾兒將行我戒之云趙大王若引
兵北向榆關亟須引兵歸太原不可救也汝欲爲天子
何不先擊退我兒徐圖亦未晚汝爲人臣旣負其主不
能擊敵又欲乘亂邀利所爲如此何面目復求官乎德
鈞俛首不能對又問器玩在此田宅何在德鈞曰在幽
州幽州今屬誰德鈞曰屬太后太后曰然則又何獻焉
德鈞益慙自是鬱鬱不多食踰年而死德鈞旣卒太祖
釋延壽而用之其後會同改元參用番漢以延壽爲樞
密使尋兼政事令太宗遣使如洛陽取延壽妻唐國長
公主以歸會同六年以延壽爲盧龍節度使是時晉少
帝初立構怨契丹延壽欲代晉帝中國屢說太宗擊晉
太宗頗然之乃集山後及盧龍兵合五萬人使將之委
之經畧中國曰得之當立汝爲帝又嘗指延壽謂晉曰
此汝主也延壽信之由是爲契丹盡力會同八年延壽
與其弟延照兵五萬南征逼貝州陷之吳巒死所殺且
萬人太宗逼澶州屯元城延壽屯南樂以延壽爲魏博
節度使封燕王會同十一年延壽進言於太宗陳橋降

卒得免死者二三十萬人先是晉軍降契丹太宗悉收其鐵仗數萬貯恒州驅馬數萬歸其國遣杜重威將其衆從已而南及河太宗以晉兵之衆恐其爲變欲悉以胡騎擁而納之河流或諫曰晉兵在他所者尙多彼聞降者盡死必皆拒命爲患不若且撫之徐思其策太宗乃使重威以其衆屯陳橋會久雪官無給士卒凍餒咸怨重威相聚而泣重威每出道旁人皆罵之太宗猶欲誅晉兵延壽言于太宗曰皇帝親冒矢石以取晉國欲自有之乎將爲他人取乎太宗變色曰朕舉國南征五年不解甲僅能得之豈爲他人乎延壽曰晉國南有唐西有蜀常爲仇敵皇帝亦知之乎曰知之延壽曰晉國東自沂密西及秦鳳延袤數千里邊於吳蜀常以兵戍之南方暑濕上國人所不能居也它日車駕北歸以晉國如此之大無兵守之吳蜀必相與乘虛入寇如此豈非爲它人取之乎太宗曰朕不知也然則奈何延壽曰陳橋降卒可分以戍南邊則吳蜀不能爲患矣太宗曰朕昔在上黨失於斷割悉以唐兵授晉旣而反爲仇讎北向與我戰爭辛勤累年僅能勝之今幸入吾手不因此時悉除之豈可復留以爲患乎延壽曰向留晉兵于河南不質其妻子故有此憂今吾悉徙其家于恒定雲

朔之間每歲分番使戍南邊何憂其爲變哉此上策也
太宗悅曰善惟大王所以處之由是陳橋兵皆得免分
遣還營天祿元年太宗初許延壽代晉後負約恨之謂
人曰我不復入龍沙矣太宗崩延壽僞稱受太宗遺詔
權知南朝軍國事永康王元欲鎖之後二年延壽卒于
契丹論曰契丹之興當朝柄國率其衆人名曰番漢襍
用然漢人無幾矣而名之彰彰尤著者莫如延徽諸人
方延徽屈身牧圉微述律后一言終其身夕陽牛背間
耳城郭宮室誰其畫之威服諸蕃誰其翼之太祖之興
延徽有力焉礪與延壽自南歸北委質太宗朝痛番臣
之橫肆救陳橋之降卒謂非忠誠天性不可而一困于
麻荅之強一失于睥睨之誤豈不重可嗟歟五代史
翟璋未詳何許人也好勇多力時目爲大蟲卽癡虎之
稱也後唐天成初自鄴都馬步軍都指揮使領平州刺
史尋改復州防禦使二年三月遷新州威塞軍兩使留
後四年五月正授旄節長興元年二月加檢校太保入
爲右領軍衛上將軍轉左羽林統軍清泰中復領新州
高祖建義割新州屬契丹時契丹大軍歸國遣璋于管
內配率犒宴之資須及十萬縑山後地貧民不堪命始
契丹以軟語撫璋璋謂必得南歸及委璋平叛奚圍雲

州皆有功故留之不遣璋鬱鬱不得志遇疾尋卒焉
又郭璘邢州人也初事後唐明宗漸升爲軍校天福中
爲奉國指揮使歷數郡刺史開運中移領易州契丹攻
其郡璘率勵士衆同其甘苦敵不能克復以州兵擊賊
數獲其利朝廷嘉之就加檢校太保契丹主嘗謂左右
曰吾不畏一天下乃爲此人抑挫重威降契丹使通事
耿崇美誘其民衆璘不能制既降爲契丹當莊宗明宗
崇美所害漢高祖卽位詔贈太傅
時攻陷營平二州及已立晉又得鴈門以北幽州節度
管內合一十六州乃以幽州爲燕京改天顯十一年爲
會同元年更其國號大遼置百官皆依中國參用中國
之人晉高祖每遣使聘問奉表稱臣歲輸絹三萬匹其
餘寶玉珍異下至中國飲食諸物使者相屬于道無虛
日德光約高祖不稱臣更表爲書稱兒皇帝如家人禮

德光遣中書令韓頌奉冊高祖爲英武明義皇帝高祖
復遣趙瑩馮道等以太常鹵簿奉冊德光及其母尊號
終其世奉之甚謹五代會要晉天福元年十一月高祖
踐位以德光有援助之力歃血爲盟
結爲父子仍約歲輸絹十三萬匹割鴈門已北及幽州
所屬縣並隸番界德光又率兵迓高祖于潞州繫幽州
節度使趙德鈞并其子樞密使趙延壽而迴三年二月
德光遣使子濟勒錫里美楞來聘三年十月又遣使來
上尊號曰英武明義晉祖繼命宰臣馮道趙瑩劉昫等
齎珍幣歲時進貢不絕德光亦遣名王已下來至六年
六月節度使安重榮執契丹使伊喇等以輕騎掠幽州
之南界高祖累遣中使齎詔開諭以契丹有助立之功
不欲負其宿約而重榮奸險肆志竟誅伊喇等馳檄天
下言契丹罪惡與襄州節度使安從進連謀不軌高祖
命杜重威率兵討之至貝州宗城縣相遇重榮之衆大
敗至七年正月二日收復鎮州斬重榮首漆之送于契
丹至其年四月高祖不豫少帝嗣立五月遣使朗布來
致弔兼獻衣服鞍馬等至十月又遣使大卿已下二十

六人來聘以高祖山陵有日致祭故也演繁露契丹主達魯河釣牛魚以其得否占歲好惡近世周茂振使金主賜之魚曰手所親釣者金亦用遼制也王易燕北錄云牛魚嘴長鱗硬頭有脆骨重百斤卽南方鰾魚也鰾鱗同然本草既有鰾魚又別有牛魚云生東海頭如牛則牛魚別是一種非鰾也馮道使契丹詩曰曾叨臘月牛頭賜史謂契丹真以牛頭賜之非也契丹主率以臘月打圍因敲冰釣魚則臘月牛頭者正本草所著東海之魚其頭如牛者也非真牛頭也高祖崩出帝卽位德光怒其不先

以告而又不奉表不稱臣而稱孫數遣使者責晉晉大臣皆恐而景延廣對契丹使者語獨不遜德光益怒楊光遠反青州招之開運元年春德光傾國南寇分其衆爲三西出鴈門攻并州劉知遠擊敗之于秀容東至于河陷博州以應光遠德光與趙延壽南攻陷貝州德光

屯元城兵及黎陽晉出帝親征遣李守貞等東馳馬家渡擊敗契丹而德光與晉相拒于河月餘聞馬家渡兵敗乃引衆擊晉戰于戚城德光臨陣望見晉軍旗幟光明而士馬嚴整有懼色謂其左右曰楊光遠言晉家兵馬半已餓死何其盛也兵旣交殺傷相半陣間斷箭遺鏃布厚寸餘日暮德光引去分其兵爲二一出滄州一出深州以歸

五代會要至九年正月德光遣趙延壽趙延昭等率兵五萬入寇貝州少帝發兵屯守澶州初青州節度使楊光遠構逆謀乃繕治城隍蓄聚芻粟爲跋扈之計屬歲不稔餓殍相繼朝廷以廩帑虛竭軍用不給仍發使郡縣括借民家資財斛斗海內嗷嗷不堪其命光遠遂以重利誘德光入寇又以趙延壽等皆中原人士常有思歸之意計羣兇盜國晉祚不濟則天福在己其月德光自河間率諸部兵入犯甘陵

昭之巡檢使吳巒投井而死河北大擾少帝駐蹕澶州
命宋州節度使高行周等將兵以禦之三月德光自領
番兵十餘萬來攻戚城官軍拒之而退又以趙延壽行
魏博節度使改封魏王以延壽門人高融爲節度副使
統步奚及燕軍數萬營于南康四月又陷德州博州其
年十二月德光又率衆南下攻圍鎮州諸邑皆陷之
二年正月德光復傾國入寇圍鎮州分兵攻下鼓城等
九縣杜重威守鎮州閉壁不敢出通鑑考異備史曰彥
矣乃通欵耶律氏請爲前導因促騎說威引軍沿滹沱
水西援常山及至真定東垣渡與威通謀先遣步衆踰
水不之救致敗將沮人心以行詭計因促監者高勲請降於虜契丹南掠邢洛磁至于
安陽河千里之內焚剽殆盡契丹見大桑木罵曰吾知
紫披襖出自汝身吾豈容汝活邪束薪于木而焚之是
時出帝病不能出征遣張從恩安審琦皇甫遇等禦之

遇前渡漳水遇契丹戰于榆林幾爲所虜審琦從後救之契丹望見塵起謂救兵至引去而從恩畏怯不敢追亦引兵南走黎陽契丹已北而出帝疾少間乃下詔親征軍于澶州遣杜重威等北伐契丹歸至古北聞晉軍已至卽復引而南及重威戰于陽城衛村晉軍飢渴鑿井輒壞絞泥汁而飲德光坐奚車中呼其衆曰晉軍盡在此矣可生擒之然後平定天下會天大風晉軍奮死擊之契丹大敗德光喪車騎一白橐駝而走至幽州其首領大將各笞數百獨趙延壽免焉是時天下旱蝗晉人苦兵乃遣開封府軍將張暉假供奉官聘于契丹奉

表稱臣以脩和好德光語不遜然契丹亦自厭兵德光
母述律嘗謂晉人曰南朝漢兒爭得一向卧耶自古聞
漢來和蕃不聞蕃去和漢若漢兒實有回心則我亦何
惜通好晉亦不復遣使然數以書招趙延壽延壽見晉
衰而天下亂常有意窺中國而德光亦嘗許延壽滅晉
而立之延壽得晉書僞爲好辭報晉言身陷虜思歸約
晉發兵爲應而德光將高牟翰亦詐以瀛州降晉晉君
臣皆喜

五代會要開運二年二月初鋒至邢州鎮州節度使杜重威差人間道告急少帝欲親率大軍

渡河決戰乃命鄆州節度使張從恩等將兵合諸將之師屯於邢州時德光之衆已及魏府建牙於元氏從恩等引軍而退其月又陷祁州刺史沈斌死之至三月德光退杜重威等率兵攻契丹之秦州下之迴及易州爲

德光精騎所圍諸將等
決力死戰德光大敗

三年七月遣杜重威李守貞張

彥澤等出兵爲延壽應兵趨瀛州牟翰空城而去晉軍
至城下見城門皆啟疑有伏兵不敢入遣梁漢璋追牟
翰及之漢璋戰死重威等軍屯武彊德光聞晉兵出乃
入寇鎮州重威西屯中渡與德光夾水而軍德光分兵
並西山出晉軍後攻破欒城縣縣有騎軍千人皆降于
虜德光每獲晉人刺其面文曰奉敕不殺縱以南歸重
威等被圍糧絕遂舉軍降德光喜謂趙延壽曰所得漢
兒皆與汝因以龍鳳赭袍賜之使衣以撫晉軍亦以赭
袍賜重威遣傅住兒監張彥澤將騎二千先入京師晉

出帝與太后爲降表自陳過咎德光遣解里以手詔賜
帝曰孫兒但勿憂管取一喫飯處德光將至京師有司
請以法駕奉迎德光曰吾躬擐甲冑以定中原太常之
儀不暇顧也止而不用出帝與太后出郊奉迎德光辭
不見曰豈有兩天子相見于道路耶四年正月丁亥朔
旦晉文武百官班于都城北望帝拜辭素服紗帽以待
德光被甲衣貂裘貂帽立馬于高岡百官俯伏待罪德
光入自封邱門登城樓遣通事宣言論衆曰我亦人也
可無懼我本無心至此漢兵引我來爾遂入晉官宮中
嬪妓迎謁皆不顧夕出宿于赤岡封出帝負義侯遷于

黃龍府癸巳入居晉宮以契丹守諸門門廡殿庭皆磔
犬掛皮以爲厭勝甲午德光胡服視朝于廣政殿乙未
被中國冠服百官常參起居如晉儀而氊裘左袒胡馬
奚車羅列階陛晉人俯首不敢仰視二月丁巳朔金吾
六軍殿中省仗太常樂舞陳于廷德光冠通天冠服絳
紗袍執大珪以視朝大赦改晉國爲大遼國開運四年
爲會同十年五代會要至三年八月契丹所部瀛州刺史偽言納款少帝復命杜重威等率大軍
迎降至十一月迴及鎮州之東垣渡與番相遇十二月
六日遣前鋒奪橋爲番軍所敗其月十日杜重威等以
軍降於德光命相州節度使張彥澤率漢騎二千先入
京城至明年正月一日德光自將大軍至京北百寮素
服班於野次蒲伏請罪皆命釋之尋降授少帝檢校太
尉負義侯令挈其族及將相近臣等於契丹黃龍府安

置二月德光降赦文改國號大德光嘗許趙延壽滅晉
遼稱會同十年升鎮州爲中京而立以爲帝故契丹擊晉延壽嘗爲先鋒虜掠所得悉
以奉德光及其母述律德光已滅晉而無立延壽意延
壽不敢自言因李崧以求爲皇太子德光曰吾于燕王
無所愛惜雖我皮肉可爲燕王用者吾可割也吾聞皇
太子是天子之子燕王豈得爲之乃命與之遷秩翰林
學士張礪進擬延壽中京留守大丞相錄尙書事都督
中外諸軍事德光索筆塗其錄尙書事都督中外諸軍
事止以爲中京留守大丞相而延壽前爲樞密使封燕
王皆如故

五代會要以燕王趙延壽爲大丞相中京留守

又以礪爲右僕射兼

門下侍郎同中書門下平章事與故晉相和凝並爲宰相礪明宗時翰林學士晉高祖起太原唐廢帝遣礪督趙延壽進軍于團栢谷已而延壽爲德光所鎖并礪遷于契丹德光重其文學仍以爲翰林學士礪常思歸逃至境上爲追者所得德光責之礪曰臣本漢人衣服飲食言語不同今思歸不得生不如死德光顧其通事高唐英曰吾戒爾輩善待此人致其逃去過在爾也因答唐英一百而待礪如故其愛之如此

契丹國志張礪磁州滏陽人也唐魏

王繼岌入蜀時爲掌書記繼岌死礪詣王府慟哭久之路王時爲翰林學士石敬瑭叛潞王以趙德鈞爲行營招討礪以翰林學士爲行營判官礪隨德鈞入契丹太宗復以爲翰林學士礪事太宗甚忠直遇事輒言無所

隱避太宗甚重之後自契丹逃歸中國爲追騎所獲太宗責之曰何故捨我去對曰臣華人飲食衣服皆不與此同生不如死願早就戮太宗顧通事高彥英曰我嘗戒汝善遇此人何故使之失所而亡若失之安可再得耶遂答彥英而謝礪是年太宗會同改元參用中國人爲公卿百官以礪爲翰林承旨兼吏部尚書太宗旣入大梁一時番將恣橫肆行殺戮如蕭翰麻答耶律耶五之類縱兵殺掠尤甚礪言于太宗曰今大遼已得天下中國將相宜用中國人爲之不宜用北人及左右近習苟政令乖失則人心不服雖得之猶將失之太宗不從後改除爲右僕射兼門下侍郎同平章事大兵北歸回居恒州麻答以鐵騎圍其第礪方卧病出見之翰數之曰汝何言于先帝云番人不以爲節度使又吾爲宣武節度使且國舅也汝在中書乃帖我又先帝留我守汴州令我處宮中汝以爲不可又譖我及解里于先帝云解里好掠人財我掠人子女我必殺汝命鎖之礪抗聲曰此皆國家大體吾實言之欲殺卽殺奚以鎖爲麻答以大臣不可專殺力救止之翰乃釋之是夕礪憤恚而卒

德光將視朝有司給延壽貂蟬冠礪三品冠服延壽

與礪皆不肯服而延壽別爲王者冠以自異礪曰吾在
上國時晉遣馮道奉冊北朝道賫二貂冠其一宰相韓
延徽冠之其一命我冠之今其可降服邪卒冠貂蟬以
朝三月丙戌朔德光服靴袍御崇元殿百官入閣德光
大悅顧其左右曰漢家儀物其盛如此我得于此殿坐
豈非真天子邪其母述律遣人賫書及阿保機明殿書
賜德光明殿若中國陵寢下宮之制其國君死葬則于
其墓側起屋謂之明殿置官屬職司歲時奉表起居如
事生置明殿學士一人掌答書詔每國有大慶弔學士
以先君之命爲書以賜國君其書常日報兒皇帝云德

光已滅晉遣其部族酋豪及其通事爲諸州鎮刺史節度使括借天下錢帛以賞軍胡兵人馬不給糧草日遣數千騎分出四野劫掠人民號爲打草穀東西二三千里之間民被其毒遠近怨嗟漢高祖起太原所在州鎮多殺契丹守將歸漢德光大懼又時已熱乃以蕭翰爲宣武軍節度使翰契丹之大族其號阿鉢翰之妹亦嫁德光而阿鉢本無姓氏契丹呼翰爲國舅及將以爲節度使李崧爲製姓名曰蕭翰于是始姓蕭德光已留翰守汴乃北歸

契丹國志蕭翰本國人述律太后之兄子也其妹復爲世宗后翰始以蕭爲姓自爾

契丹后族皆稱蕭氏翰最殘忍工騎射太宗與張敬達交鋒翰等自東北起衝唐兵爲二唐兵大敗步兵死者

萬人爲節度使百官請迎太后太宗曰太后族大如古柏根不可移也又欲盡以晉百官自隨恐搖人心乃詔有職事者從行餘留大梁復以汴州爲宣武軍翰爲節度使滋德宮有官人五十餘人翰欲取之宦者張環不與翰破鎖奪官人執環燒錢灼之腹爛而死初翰聞北漢高祖擁兵而南欲北歸恐中國無主必大亂已不得從容而去時唐明宗子許王從益與王淑妃在洛陽翰遣高謨翰迎之矯稱太宗命以從益知南朝軍國事召已赴恒州從益淑妃匿于徽陵下宮不得已而出至大梁翰立以爲帝帥諸酋長拜之立百官留燕兵千人爲從益宿衛翰乃辭行翰至恒州以兵圍張礪之第麻答以大臣不可以晉內諸司伎術宮女諸軍將卒數千人從專殺乃止

自黎陽渡河行至湯陰登愁死岡謂其宣徽使高勲曰我在上國以打圍食肉爲樂自入中國心常不快若得復吾本土死亦無恨勲退而謂人曰虜將死矣相州梁

暉殺契丹守將閉城距守德光引兵攻破之城男子
無少長皆屠之婦女悉驅以北後漢以王繼宏鎮相州
得髑髏十數萬枚爲大冢葬之德光至臨洺見其井邑
荒殘契丹國志耶律郎五郎耶律忠國主族人也太祖
南攻石晉郎五扈從累有戰功太祖入大梁以郎
五爲鎮寧節度使郎五性殘虐澶州人苦之賊帥王綬
率其徒千餘人襲據南城北渡浮航縱兵大掠圍郎五
于牙城郎五聞漢平鄴杜重威嘗懼華人爲變未幾郎
五與麻答等焚掠定州悉驅其人并北城去方廣千里
剽掠殆盡論曰陰山異氣殺伐鍾焉運數所乘山河改
色太宗德光鐵馬中原翰等諸人分麾長驚而谿壑難
滿剽掠窮凶而使忠臣鬱憤恚之胸笑謂晉人曰致中
生靈塗肝腦之血不亦重可悲歟

國至此皆燕王爲罪首又顧張礪曰汝亦有力焉德光
行至樂城得疾卒于殺胡林契丹破其腹去其腸胃實

之以鹽載而北晉人謂之帝羝焉永康王兀欲立諡德
光爲嗣聖皇帝號阿保機爲太祖德光爲太宗五代史
安巴堅
凡三子皆雄偉長曰人皇王托雲卽東丹王也次曰元
帥太子卽德光也幼曰阿敦少君德光本名耀庫濟後
慕中華文字遂改焉唐天成初安巴堅死其母令德光
權主牙帳令少子阿敦少君往渤海國代托雲托雲將
立而德光素爲部族所服又其母亦常鍾愛故因而立
之明宗時德光遣使摩琳等三十餘人來修好又遣使
爲父求碑石明宗許之賜與甚厚并賜其母璫珞錦綵
自是山北安靜蕃漢不相侵擾三年德光僞改爲天顯
元年是歲定州王都作亂求援于契丹德光遂陷平州
托諾以騎五千援都于中山招討使王晏球破之于幽
陽托諾走保賊城其年七月又遣特哩袞率七千騎救
定州王晏球逆戰于唐河北大破之幽州趙德鈞以生
兵接于要路生擒特哩袞等首領五十餘人獻于闕下
明年王都平擒托諾及餘衆斬之自是契丹大挫數年
不敢窺邊嘗遣使紐赫美稜來求托諾骸骨明宗怒其
詐斬之長興二年東丹王托雲在闕下其母繼發使申

報朝廷亦優容之長興末契丹迫雲州明宗命晉高祖
爲河東節度使兼北面蕃漢總管清泰三年晉高祖爲
張敬達等攻圍甚急遣指揮使何福賁表乞師願爲臣
子德光白其母曰兒昨夢太原石郎發使到國今果至
矣事符天意必須赴之德光乃自率五萬騎由鴈門至
晉陽卽日大破敬達之衆于城下尋冊晉高祖爲大晉
皇帝約爲父子之國割幽州管内及新武雲應朔州之
地以賂之仍每歲許輸帛三十萬時幽州趙德鈞屯兵
于團柏谷遣使至幕帳求立己爲帝以石氏世襲太原
德光對使指帳前一石曰我已許石郎爲父子之盟石
爛可改矣楊光遠等殺張敬達降于契丹德光戲謂光
遠等曰汝輩大是惡漢兒不用鹽酪食却一萬匹戰馬
光遠等大慙晉高祖南行德光自送至潞州時趙德鈞
趙延壽自潞州出降于契丹德光鎖之令隨牙帳晉高
祖入洛尋遣宰相趙瑩致謝于契丹天福三年又遣宰
臣馮道左僕射劉昫等持節冊德光及其母氏徽號賁
鹵簿儀仗法服車輅于本國行禮德光大悅尋遣使奉
晉高祖爲英武明義皇帝是歲契丹改天顯十一年爲
會同元年以趙延壽爲樞密使升幽州爲南京以趙思
溫爲南京留守旣而德光請晉高祖不稱臣不上表來

往緘題止用家人禮但云兒皇帝晉祖厚賚金帛以謝之晉祖奉契丹甚至歲時問遺慶弔之禮必令優厚每北使至卽于別殿致敬德光每有邀請小不如意則來譴責晉祖每屈己以奉之終晉祖世畧無罅隙及少帝嗣位遣使入契丹德光以少帝不先承稟擅卽尊位所賚文字畧去臣禮大怒形于責讓朝廷使去卽加譴辱會契丹迴國使喬榮北歸侍衛親軍都指揮使景延廣謂榮曰先朝是契丹所立嗣君乃中國自冊稱孫可矣稱臣未可中國自有十萬口橫磨劍要戰卽來榮至本國具言其事德光大怒會青州楊光遠叛遣使構之明年冬德光率諸部南下開運元年春陷祁州直抵大河少帝幸澶州以禦之其年三日德光敗于陽城棄其車帳乘一橐駝奔至幽州因怒其失律自大首領已下各杖數百惟趙延壽免焉是時契丹連歲入寇晉氏疲于奔命邊民被苦幾無寧日晉祖桑維翰勸少帝求和于契丹以紓國難少帝許之乃遣使奉表稱臣卑辭首過使迴德光報曰但使桑維翰延廣自來并割鎮定與我則可通和也朝廷知其不可乃止時契丹諸部頻年出征蕃國君臣稍厭兵革德光母嘗謂蕃漢臣寮曰南朝漢兒爭得一向卧耶自古

今惟聞漢來和蕃不聞

蕃去和漢待伊漢兒的當迴心我亦不惜通好也三年樂壽監軍王繼繼有密奏告瀛鄭可取之狀十月少帝遣杜重威李守貞等率兵理畧十一月蕃將高牟翰敗晉師于瀛州之北梁漢璋元之契丹主聞晉旣出兵自率諸部由易定抵鎮州杜重威等自瀛州西趨常山至中渡橋敵已至矣兩軍隔源水而砦焉十二月十日杜重威率諸軍降于契丹語仕晉少帝紀中十二日德光入鎮州大犒軍士十四日自鎮州南行中渡降軍所釋甲仗百萬計並令于鎮州收貯戰馬數萬匹長驅而北命張彥澤領二千騎先趨東京遣重威部轄降兵取邢相路前進晉少帝遣子延煦延寶奉降表于契丹並傳國寶一紐至牙帳明年春正月朔日德光至汴北文武百官迎于路是日入宮至昏復出次于赤岡五日僞制降晉少帝爲負義侯于黃龍府安置七日德光復自赤岡入居于大內分命使臣于京城及往諸道括借錢帛僞命以李崧爲西廳樞密使以馮道爲太傅以左僕射和凝及北來翰林學士承旨張礪爲宰相二月朔日德光服漢法服坐崇元殿受蕃漢朝賀僞制大赦天下改晉國爲大遼國以趙延壽爲大丞相兼政事令充樞密使兼中京留守降東京爲防禦州尋復爲宣武軍

十五日漢高祖建號于晉陽德光聞之削奪漢祖官爵是月晉州潞州並歸河東時盜賊所在羣起攻劫州郡斷澶州浮梁契丹大恐汾河諸蕃鎮並以腹心鎮之三月朔日德光坐崇元殿行入閣之禮觀漢家儀法之盛大悅以其大將蕭翰爲汴州節度使十七日德光北還發離東京宿于赤岡有大聲如雷起于牙帳之下契丹自黎陽濟河次湯陰縣界有一岡土人謂之愁死岡德光憩于其上謂宣徽使高勲曰我在上國以打圍食肉爲樂自及漢地每每不快我若得歸本土死亦無恨勲退而謂人曰其語偷殆將死矣時賊帥梁暉據相州德光親率諸部以攻之四月四日屠其城而去德光聞河陽軍亂謂蕃漢臣寮曰我有三失殺上國兵士打草穀一失也天下括錢二失也不尋遣節度使歸藩三失也十六日次于樂城縣殺虎林之側時德光已得寒熱疾數日矣命部人賁酒脯禱于得疾之地十八日晡時有大星落于穹廬之前若迸火而散德光見之西望而唾連呼曰劉知遠滅劉知遠滅是月二十一日卒時年四十六主契丹凡二十二年契丹人破其屍摘去腸胃以鹽沃之載而北去漢人目之爲帝羆焉五代會要三月德光自京率衆北歸至四月十八日殂於樂城

五代史記卷第七十二

五代史記卷第七十三

廬陵歐陽脩撰

徐無黨原注

南昌彭元瑞注

劉鳳誥排次

四夷附錄第二

兀欲東丹王突欲子也突欲奔于唐兀欲畱不從號永康王契丹好飲人血突欲左右姬妾多刺其臂吮之其小過輒挑目封灼不勝其毒然喜賓客好飲酒工畫頗知書其自契丹歸中國載書數千卷樞密使趙延壽每假其異書醫經皆中國所無者明宗時自滑州朝京師遙領武信軍節度使食其俸賜甲第一區宮女數人契

丹兵助晉于太原唐廢帝遣宦者秦繼旻皇城使李彥

紳殺突欲于其第晉高祖追封突欲爲燕王

契丹國志東丹王名

突欲太祖長子母曰述律氏太祖攻渤海拔其夫餘城更名曰東丹國命其長子突欲鎮東丹號人皇王時唐明宗初年也太祖崩于渤海述律后使少子安端少君守東丹與長子突欲奉太祖之喪發渤海先是突欲鎮東丹時乃渤海國亦有宮殿被十二旒冕服皆畫龍像稱制行令凡渤海國左右平章事大內相已下百官皆其國自除授歲貢契丹國細布五萬疋麗布十萬疋馬一千匹太祖崩述律后愛中子德光欲立之至西樓命與突欲俱乘馬立帳前謂諸將曰二子吾皆愛之莫知所立汝曹擇可立者執其轡諸將知意爭躍曰願事元帥太子后曰衆之所欲我安敢違遂立之爲天皇王稱皇帝突欲慍帥數百騎欲奔唐爲邏者所遏后不罪遣歸東丹唐明宗長興元年突欲自以失職帥部曲四十人越海自登州奔唐明宗賜姓東丹名慕華以爲懷化節度使瑞慎等州觀察使其部曲及先所俘將惕隱等皆賜姓名惕隱姓狄名懷惠次年明宗更賜東丹慕華

姓名曰李贊華明宗長興三年以贊華爲義成節度使
選朝士爲僚屬輔之贊華但優游自奉不務政事明宗
嘉之雖時有不法亦不問以莊宗後宮夏氏妻之贊華
好飲人血姬妾多刺臂以吮之婢僕小過或抉目或刀
刳火灼夏氏不忍其殘奏離婚爲尼贊華之歸唐乘船
踰海因于海岸上立木爲碑惟書二十漢字詩云小山
壓大山大山全無力羞見故鄉人從此投外國贊華性
好讀書不喜射獵初在東丹時令人賁金寶私入幽州
市書載以自隨凡數萬卷置書堂于盤巫閭山上扁曰
望海堂璐王末年石晉內叛求援契丹璐王已危乃遣
宦者秦繼旻皇城使李彥紳殺之贊華遇害于其第石
晉詔贈贊華燕王遣使送其喪歸國其後太宗破石晉
入中原求得李彥紳秦繼旻殺之以其家族財物賜東
丹王子兀欲兀欲後卽位爲世宗葬之盤巫閭山謚讓
國皇帝五代會要晉天福元年十二月追封故東丹
王李贊華爲燕王宣和書畫譜李贊華北虜東丹王
初名突欲保機之長子唐同光中從其父攻渤海扶餘
城下之改爲東丹國以突欲爲東丹王避嗣主德光之
逼遂越海抵登州而歸中國唐明宗長興元年十二
月也明宗賜與甚厚仍賜姓東丹名慕華以其來自遼

東乃以瑞州爲懷化軍拜懷化軍節度使瑞慎等州觀察使又賜姓李更名贊華始汎海歸中國載書數千卷自隨尤好畫多寫貴人酋長至抽戈挾彈牽黃臂蒼服用皆縵胡之縷鞍勒率皆瓊奇不作中國衣冠亦安於所習者也然議者以謂馬尚豐肥筆乏壯氣其確論歟清異錄契丹東丹王突欲買巧石數峰目爲空青府德光滅晉兀欲從至京師德光殺繼旻彥紳籍其家貲悉以賜兀欲德光死欒城兀欲與趙延壽及諸大將等俱入鎮州延壽自稱權知軍國事遣人求鎮州管鑰于兀欲兀欲不與延壽左右曰契丹大人聚而謀者詢詢必有變宜備之今中國之兵猶有萬人可以擊虜不然事必不成延壽猶豫不決兀欲妻延壽以爲妹五月朔旦兀欲召延壽及張礪李崧馮道等置酒酒數行兀欲

謂延壽曰妹自上國來當一見之延壽欣然與兀欲俱入食頃兀欲出坐笑謂礪等曰燕王謀反鎖之矣諸君可無慮也又曰先帝在汴州與我算子一莖許我知南朝軍國事昨聞寢疾無遺命燕王安得自擅邪礪等罷去兀欲召延壽廷立而詰之延壽不能對乃遣人監之而籍其家貲兀欲宣德光遺制曰永康王大聖皇帝之嫡孫人皇王之長子可于中京卽皇帝位中京契丹謂鎮州也遣使者告哀于諸鎮蕭翰聞德光死棄汴州而北至鎮州兀欲已去翰以騎圍張礪宅執礪而責曰汝教先帝勿用故人爲節度使何也礪對不屈翰鎖之是

夕礪卒兀欲爲人雋偉亦工畫能飲酒好禮士德光嘗
賜以絹數千匹兀欲散之一日而盡兀欲已立先遣人
報其祖母述律述律怒曰我兒平晉取天下有大功業
其子在我側者當立人皇王背我歸中國其子豈得立
邪乃率兵逆兀欲將廢之兀欲留其將麻荅守鎮州晉
諸將相隨德光在鎮州者皆留之而去以翰林學士徐
台符李澣從行與其祖母述律相距于石橋述律所將
兵多亡歸兀欲兀欲乃幽述律于祖州祖州阿保機墓
所也述律爲人多智而忍阿保機死悉召從行大將等
妻謂曰我今爲寡婦矣汝等豈宜有夫乃殺其大將百

餘人曰可往從先帝左右有過者多送木葉山殺于阿保機墓隧中曰爲我見先帝于地下大將趙思溫本中國人也以材勇爲阿保機所寵述律後以事怒之使送木葉山思溫辭不肯行述律曰汝先帝親信安得不往見之思溫對曰親莫如后后何不行述律曰我本欲從先帝于地下以子幼國中多故未能也然可斷吾一臂以送之左右切諫之乃斷其一腕而釋思溫不殺初德光之擊晉也述律嘗非之曰吾國用一漢人爲主可乎德光曰不可也述律曰然則汝得中國不能有後必有禍悔無及矣德光死載其尸歸述律不哭而撫其尸曰

待我國中人畜如故然後葬汝已而兀欲囚之後死于

木葉山兀欲更名阮號天授皇帝改元曰天祿五代會要會同

十年五月宣遣制以永康王烏雲襲其尊位永康王者

東丹王托雲之長子也烏雲自以猶子不當嗣位且不

奉祖母之命其諸部首領素畏舒魯氏之酷法復以安

巴堅死於渤海國被殺者百人今德光沒于漢地慮必

獲罪如前同謀以其月二十一日領部族歸國舒魯氏

歸於石橋番中地名其衆悉降於烏雲命送舒魯氏於

安巴堅明殿以幽之安巴堅陵寢謂之明殿是歲八月

乃改會同十年爲天祿元年自稱天授皇帝葬德光于木葉山遣人至鎮州召馮道和凝等會葬使

者至鎮州鎮州軍亂大將白再榮等逐出麻荅據定州

已而悉其衆以北麻荅者德光之從弟也契丹國志麻荅太宗之從

弟也會同九年契丹攻黎陽麻荅先驅晉博州刺史周

儒以城降未幾周儒引麻荅自馬家口濟河營于東岸

攻鄆州北津又陷德州擒刺史尹居璠太宗南入大梁以麻荅爲安國節度使又以爲中京畱守至恒州崔廷勲見麻荅趨走拜起跪而獻酒麻荅踞而受之麻荅貪殘僭忍民間有珍貨美女必奪取之又捕村民誣以爲盜披面抉目斷腕焚炙而殺之欲以威衆常以其具自隨左右前後懸人肝膽手足飲食起居于其間語笑自若出人或披黃衣用乘輿服御物曰茲事漢人以爲不可吾國無忌也又以宰相負不足乃牒馮道判史館李崧判宏文館和凝判集賢劉煦判中書其僭妄如此然契丹威犯法無所容貸故市肆不擾常恐漢人亡去謂門者曰漢有窺門者卽斷其首來麻荅遣使督運于洛州防禦使薛懷讓聞漢高祖入大梁殺其使者舉州降高祖遣兵萬人會懷讓攻劉鐸于邢州不克鐸請兵于麻荅遣其將楊安及前義武節度使李殷將千騎攻懷讓于洛州懷讓嬰城自守安等縱兵大掠于邢洛之境契丹所畱守不滿一千麻荅令所司給萬四千人食收其餘以自入麻荅常疑漢兵且以爲無用稍稍廢省又損其食以飼蕃兵衆心怨忿漢兵謀攻麻荅然畏契丹尙強猶豫未決會楊衮楊安等軍出契丹畱恒州者僅八百人何福進等遂決計未幾召馮道李崧會葬太宗

漢兵突入府中焚衙門與契丹戰會日暮有村民數千
噪于城外欲奪北兵寶貨婦女北兵懼而北通麻荅劉
晞崔廷勲皆奔定州與義成節度使耶律忠合漢有白
再榮者拘人取財恒州謂之白麻荅虐可知矣麻荅歸
世宗殺之通鑑注宋白曰麻荅本名解里德光滅晉
阿保機之從子也其父曰撒剌歸梁死於汴
以爲邢州節度使兀欲立命守鎮州麻荅尤酷虐多略
中國人剝面抉目拔髮斷腕而殺之出入常以鉗鑿挑
割之具自隨寢處前後掛人肝脰手足言笑自若鎮定
之人不勝其毒麻荅已去馮道等乃南歸漢乾祐元年
兀欲率萬騎攻邢州陷內邱契丹入寇常以馬嘶爲候
其來也馬不甚嘶鳴而矛戟夜有光又月蝕虜衆皆懼
以爲凶雖破內邱而人馬傷死者大半

五代會要漢乾祐三年十一月

烏雲率騎數萬南寇陷邢州之內邱縣深州之饒陽縣兀欲立五年會諸部酋長

復謀入寇諸部大人皆不欲兀欲強之燕王述輒與太

寧王嘔里僧等率兵殺兀欲于大神淀德光子齊王述

律聞亂走南山契丹擊殺述輒嘔里僧而迎述律以立

述律立改元應歷號天順皇帝後更名璟述律有疾不

能近婦人左右給事多以宦者然畋獵好飲酒不恤國

事每酣飲自夜至旦晝則常睡國人謂之睡王初兀欲

常遣使聘漢使者至中國而周太祖入立太祖復遣將

軍朱憲報聘憲還而兀欲死述律立遂不復南寇五代會要

周廣順元年正月太祖命左千牛衛將軍朱憲往修和好烏雲亦遣使雅古吉報命獻良馬四匹太祖復命尚

書左丞田敏供奉官蔣光遂銜命往聘至其年四月敏等迴烏雲遣使什哩獻碧玉金鍍銀裹鞍轡并馬四十匹其月太祖又命左金吾將軍姚漢英右神武將軍華光裔往使至其年九月烏雲爲部下太寧王偉王子燕王碩岳所殺舒嚕德光之子勒所部誅太寧王碩岳舒嚕自立號天順皇帝改名璟稱應歷元年顯德元年春太原劉崇將圖南寇舒嚕使蕃將楊衮率朔騎萬餘以助之三月世宗親征與崇戰於潞州高平縣之南原崇軍大敗蕃衆棄甲而遁二年三月命許州節度使王彥超等築壘於李晏口與番兵數千騎戰於安平縣之南敗之顯德馬令南唐書保大十二年秋七月契丹使其舅來聘昇元中宋齊邱選宮嬪雜以珠貝羅綺泛海北通契丹欲賴之以復中原而虜使至則厚幣遣還迨至淮北輒使人刺之復遣使沿海齎琛寶以報聘虜意晉人殺其使數犯中原至是館虜使於清風驛夜醢更衣盜斬其首契丹自此不至蓋中原間之也陸游南唐書保大十二年秋七月契丹使其舅來聘夜宴清風驛盜斬契丹使亡去捕之不得或以爲周人也自是契丹遂不至又烈祖昇元二年契丹主耶律德光及其弟東丹王各遣使以羊馬入貢別持羊三萬口馬二

百匹來鬻以其價市羅執茶藥烈祖從之於是翰林院
進二丹入貢圖詔中書舍人江文蔚作贊其詞曰皇帝
建西都之歲神功邁於三古皇風格於四裔華夷咸若
駿奔結軌粵六月契丹使梅里捺盧古東丹使兵器寺
少令高徒煥奉書致貢咸集都邑公卿庶尹拜手稽首
稱賀以爲文德所服受命之符也若迺鴻荒以降驟步
相侔耀武以信威有所不及任算以御物有所不從詩
頌太原之師則用伐矣漢開朔方之地則崇力矣若我
宣猷大麓儼德無私刑于朝廷以及于荒服旃裘左袵
捧日分光殊方異產充庭納費易曰垂衣裳而天下治
斯之謂矣有司紀美烈于繪事傳曰主上明聖而德不
聞有司之過也職在翰墨親覩隆平敢獻贊曰赫矣聖
武纂堯之緒要荒之長駿奔臣附伏波之柱單于之臺
遺鏃徒費猷琛靡來我后穆穆我網恢恢重譯日貢皇
哉唐哉四年德光遣使獻馬百匹於是烈祖遣通事舍
人判四方館事歐陽遇借鴻臚少卿使契丹假道於晉
高祖不可遇及境而復元宗嗣位遣使者公乘鎔航海
繼好旣至而契丹主兀欲被殺弟述律遣元宗書曰大
契丹天順皇帝謹致書大唐皇帝闕下貴朝使公乘鎔
等自去秋已達東京海岸適遭國禍今年二月二十六

日部署一行并諸儀物兵鎧已至燕京茲蒙敦念先朝
踐修舊好既增摧痛又切感銘貴國長直官王朗陳篆
取間道先回用附咨報公乘鎔已遣伴送使陳植同回
止俟便風卽令引道而公乘鎔亦以蠟封帛書其詞曰
臣鎔自去年六月離罌油七月至鎮東關遣王朗奉表
契丹九月乃有番官吏離畢部牛車百餘乘及鞍馬治
路置頓十月至東京留三日契丹主遣閑廐使王廷秀
稱詔勞問兼述泰寧王燕王九月同行大事兀欲卽世
母妻併命又遼東以西水潦壞道數百里車馬不通今
年正月方至幽州館于愍忠寺先迎御容入宮言元欲
識唐皇帝面乃引見如舊儀問國書中機事臣卽述奕
世歡好當謀分裂之事契丹主喜問復有何事臣云軍
機別有密書契丹主接置袖間乃云吾與唐皇帝一如
先朝往來因置酒合樂又諭臣曰使人遠泛巨海而至
不期骨肉間倏起此事道路所聞必亦憂恐手斟一玉
鍾酒先自啜乃以勸臣令飲醕自旦至日晡始罷自是
數遣使宣勞三日一賜食謹遣王朗齋設號子歸聞奏
設號子不知何等語也初宋齊邱謀間晉會契丹使燕
人高霸來聘歸至淮北唐陰遣人刺殺之霸有子乾從
行匿之濠州于是契丹頗信以爲霸之死出於晉人保

大十二年述律遣其舅來夜宴清風驛起更衣忽仆於地視之失其首矣厚賞捕賊不得久乃知周大將荆罕儒知契丹使至思遣客刺之以間唐乃下令能得吾枕者賞三百緡錢俄有劍客田英得之卽給賞如約仍屏人語之曰能得江南番使頭賞三千緡英果得之自是唐與契丹遂絕及世宗兵出淮南勅暴我罪曰蠢爾淮甸敢拒大邦跋扈飛揚垂六十載幸累朝多事與北虜交通厚起戎心誘爲邊患所罪狀我雖非一然首以通契丹爲興師之名方石晉以父事契丹而契丹每以兄事南唐蓋戎狄習見唐之威靈故聞後裔在江南猶尊之不敢與他國齒南唐亦頗恃以自驕其實相結約撓中原皆虛詞非能爲南唐助也

六年夏世

宗北征以保大軍節度使田景咸爲淤口關部署右神武統軍李洪信爲合流口部署前鳳翔節度使王晏爲益津關部署侍衛親軍馬步都虞候韓通爲陸路都部署世宗自乾寧軍御龍舟艘船戰艦首尾數十里至益

津關降其首將而河路漸狹舟不能進乃捨舟陸行瓦

橋淤口關瀛漠州守將皆迎降方下令進攻幽州冊府元龜

周李潛初仕晉爲翰林學士晉末契丹犯關明年春隨
廬帳北行虜主永康王善待之永康入國以潛華人不
令隨從留住幽州供給亦厚永康爲述軋所殺述律代
立部族首領多被戮永康妻弟曰蕭海真亦謂之蟬得
舍利爲幽州節度使與潛相善每與潛言及中國意深
慕之潛常微以言挑之欣然遂納會定州節度使遣謀
者田重霸繼往幽州偵邏軍事每令潛至潛所密謀還
計潛亦致書于定帥致謝定帥表其事太祖哀潛羈離
異域常有南歸之意乃令田重霸齎詔賜之兼令潛兄
太子賓客潛客通家問潛得詔甚感太祖恩因重霸迴
致謝曰田重霸至伏蒙聖慈特頒明詔降日中之文字
慰天外之流離別述宸慈俾傳家信如見骨肉倍感君
親又奏陰事曰昨田重霸至爲無與蕭海真詔勅祇有
兄濤家書不敢將出方欲遣田重霸却回至五月四日
海真差中門使趙珣傳語臣云昨擬差人齎絹書上南
朝皇帝請發兵來兼取得姚漢英等奏狀所貴聽信其

網文印押了未封被趙珮通事懷內遺失交下憂怕不知所爲臣既認實心遂喚趙珮通事李解里來呈與書詔當時聞于海真極喜引臣竊謝尋喚重霸于私宅相見至五月二十六日又喚重霸于衙內一宿今月四日令趙珮將銀十兩令與重霸兼傳語與臣云我心如鐵石但令此人且迴諸事宿時說與一一已令口奏候南朝有文字來則別差人去今因奏陳皆據目前所得至于機事兵勢權謀非臣愚爲敢陳鄙款伏乞妙延良弼周詰嘉謨斷于宸衷用叶廟勝又與濤書言契丹述律事云今王驕驍唯奸擊鞠耽于內寵固無四方之志觀其勢不同已前親密貴臣尚懷異志卽微弱可知不敗備奏一則煩文一則恐涉爲身計大好乘其亂弱之時計亦易和若辦得來討惟速若世宗遇疾乃置雄州且和亦惟速將來必不爲河東也于瓦橋關霸州于益津關而還周師下三關瀛漠兵不血刃述律聞之謂其國人曰此本漢地今以還漢又何惜邪述律後爲庖者因其醉而殺之儒林公議契丹自阿保機雄據燕北

之地修其國之威法諸戎遂漸爲所制常得中國所賜
執錦以其精緻者藉地使牧豎汗踐之親近者或問其
故曰我國他日富盛是等固當踐之其用意貪侈豈易
盈哉自石晉求援爲耶律德光所立約爲父子之國歲
輸絹三十萬舉雁門以北及幽州之地爲德光壽自是
失其控壓之要縻之無全策矣虜雖時有聘問不過豐
貂大腊頭駿數四而已其隣國曰渤海女真室韋達靼
奚霫之類皆奉之其民慄驚善鬪堪艱苦但衆寡不侔
故爲所制耳梁及後唐時尚有來貢者自是沮問逼于
彊力晉高祖時桑維翰疏云契丹自數年來最爲強盛
侵伐鄰國吞滅諸蕃蓋謂是也每興兵援塞則傳一矢
爲信諸國皆震懼奔會無後期者每戰必銜枚無喧專
顧指命統帥之下各有部陳畫戰則望旗幟遇夜則或
鳴鉦或吹蠡角或爲禽鳥之聲各隨部隊撤卷而去至
明不遺一旗軍令至峻常以什伍相分一人趨敵則什
伍助前後急不相赴援則盡誅之故其人能死戰而又
山後郡縣俗情篤實高上武士農工商四者俱備以
資其用其主雖遷徙山入非廬不居然有垣壘宮室矣
其民雖疥墮寒冽非旃毳不禦然有衣服染績矣自開
運中德光亂華盡得三古朝帑寶圖書服器工巧事多慕

擬中國久而益盛矣始石晉時關南山後初蒞虜民既不樂附又爲虜所侵奪日久企思中國聲教常若偷息苟生周世宗止平關南功不克就歲月既久漢民宿齒盡逝新少者漸便習不怪然居常右虜下漢其間士人及有識者亦嘗悵然無可奈何

嗚呼自古夷狄服叛雖不繫中國之盛衰而中國之制夷狄則必因其強弱予讀周日歷見世宗取瀛漠定三關兵不血刃而史官譏其以王者之師馳千里而襲人輕萬乘之重于萑葦之間以僥倖一勝夫兵法決機因勢有不可失之時世宗南平淮甸北伐契丹乘其勝威擊其昏怠世徒見周師之出何速而不知述律有可取之機也是時述律以謂周之所取皆漢故地不足顧也

然則十四州之故地皆可指麾而取矣不幸世宗遇疾
功志不就然瀛漠三關遂得復爲中國之人而十四州
之俗至今陷于夷狄彼其爲志豈不可惜而其功不亦
壯哉夫兵之變化屈伸豈區區守常談者所可識也初
蕭翰聞德光死北歸有同州郃陽縣令胡嶠爲翰掌書
記隨入契丹而翰妻爭妬告翰謀反翰見殺嶠無所依
居虜中七年當周廣順三年亡歸中國略能道其所見
云自幽州西北入居庸關明日又西北入石門關關路
崖狹一夫可以當百此中國控扼契丹之險也又三日
至可汗州南望五臺山其一峯最高者東臺也又三日

至新武州西北行五十里有雞鳴山云唐太宗北伐聞
雞鳴于此因以名山明日入永定關此唐故關也又四
日至歸化州又三日登天嶺嶺東西連亘有路北下四
顧冥然黃雲白草不可窮極契丹謂嶠曰此辭鄉嶺也
可一南望而爲永訣同行者皆慟哭往往絕而復蘇又
行三四日至黑榆林時七月寒如深冬又明日入斜谷
谷長五十里高崖峻谷仰不見日而寒尤甚已出谷得
平地氣稍溫又行二日渡湟水又明日渡黑水又二日
至湯城淀地氣最溫契丹苦大寒則就溫于此其水泉
清冷草軟如茸可藉以寢而多異花記其二種一日旱

金大如掌金色爍人一日青囊如中國金燈而色類藍可愛又二日至儀坤州渡麝香河自幽州至此無里埃其所向不知爲南北又二日至赤崖翰與兀欲相及遂及述律戰于沙河述律兵敗而北兀欲追至獨樹渡遂囚述律于撲馬山又行三日遂至上京所謂西樓也西樓有邑屋市肆交易無錢而用布有綾錦諸工作宦者翰林伎術教坊角觝秀才僧尼道士等皆中國人而并汾幽薊之人尤多自上京東去四十里至真珠寨始食菜明日東行地勢漸高西望平地松林鬱然數十里遂入平州多草木始食西瓜云契丹破回紇得此種以牛

糞覆棚而種大如中國冬瓜而味甘又東行至褒潭始有柳而水草豐美有息雞草尤美而本大馬食不過十本而飽自褒潭入大山行十餘日而出過一大林長二三里皆蕪荑枝葉有芒刺如箭羽其地皆無草兀欲時卓帳于此會諸部人葬德光自此西南行日行六十里行七日至大山門兩高山相去一里而長松豐草珍禽野卉有屋室碑石曰陵所也兀欲入祭諸部大人惟執祭噐者得入入而門闔明日開門曰拋蓋禮畢問其禮皆秘不肯言嶠所目見囚述律葬德光等事與中國所記差異已而翰得罪被鎖嶠與部曲東之福州福州翰

所治也嶠等東行過一山名十三山云此西南去幽州二千里又東行數日過衛州有居人三十餘家蓋契丹所虜中國衛州人築城而居之嶠至福州而契丹多憐嶠教其逃歸嶠因得其諸國種類遠近云距契丹國東至于海有鐵甸其族野居皮帳而人剛勇其地少草木水鹹濁色如血澄之久而後可飲又東女真善射多牛鹿野狗其人無定居行以牛負物遇雨則張草爲屋常作鹿鳴呼鹿而射之食其生肉能釀糜爲酒醉則縛之而睡醒而後解不然則殺人又東南渤海又東遼國皆與契丹略同其南海曲有魚鹽之利又南奚與契丹略

同而人好殺戮又南至于榆關矣西南至儒州皆故漢地西則突厥回紇西北至嫪厥律其人長大髦頭酋長全其髮盛以紫囊地苦寒水出大魚契丹仰食又多黑白黃貂鼠皮北方諸國皆仰足其人最勇隣國不敢侵又其西轄戛又其北單于突厥皆與嫪厥律略同又北黑車子善作車帳其人知孝義地貧無所產云契丹之先常役回紇後背之走黑車子始學作車帳又北牛蹄突厥人身牛足其地尤寒水曰葫蘆河夏秋水厚二尺春冬冰徹底常燒器銷冰乃得飲東北至韃劫子其人髦首披布爲衣不鞍而騎大弓長箭尤善射遇人輒殺

而生食其肉契丹等國皆畏之契丹五騎遇一轆劫子則皆散走其國三面皆室韋一曰室韋二曰黃頭室韋三曰獸室韋其地多銅鐵金銀其人工巧銅鐵諸器皆精好善織毛錦地尤寒馬溺至地成冰堆又北狗國人身狗首長毛不衣手搏猛獸語爲犬嗥其妻皆人能漢語生男爲狗女爲人自相婚嫁穴居食生而妻女人食云嘗有中國人至其國其妻憐之使逃歸與其筋十餘隻教其每走十數里遺一筋狗夫追之見其家物必銜而歸則不能追矣其說如此又曰契丹嘗選百里馬二十匹遣十人齎乾餒北行窮其所見其人自黑車子歷

牛蹄國以北行二年經四十三城居人多以木皮爲屋
其語言無譯者不知其國地山川部族名號其地氣遇
平地則溫和山林則寒冽至三十三城得一人能鐵甸
語其言頗可解云地名頡利烏于耶堰云自此以北龍
蛇猛獸魑魅羣行不可往矣其人乃還此北荒之極也
契丹謂嶠曰夷狄之人豈能勝中國然晉所以敗者主
暗而臣不忠因具道諸國事曰子歸悉以語漢人使漢
人努力事其主無爲夷狄所虜吾國非人境也嶠歸錄
以爲陷虜記云

原注契丹年號諸家所記舛謬非一莫可攷正惟嘗見于中國可據也據耶律

德光立晉高祖冊文云惟天顯九年歲次丙申是歲乃晉天福元年推而上之得唐天成三年戊子爲天顯元

年按契丹附錄德光與唐明宗同年而立立三年改元
天顯與此正合矣又據開運四年德光滅晉入汴賜赦
稱會同十年推而上之得天福三年爲會同元年是天
顯盡十年而十一年改爲會同矣惟此二者其據甚明
餘皆不足攷也附錄所載夷狄年號
多畧不書蓋無所用故不必備也

五代史記卷第七十三